

~~Handwritten scribble~~ 2/15

00/14

Fort
ff

00





Vier tröst-
liche Psalmen. An
die Königin zu Hun-
gern ausgelegt
durch
Martinum Luther.

Wittenberg.

M. D. XXVII.





Der durchleuchtigsten hochge-
bornen frawen/ frawen Mariae geborne Königin
zu Hispanien ꝛc. Königen zu Hungern/
vnd Behemen ꝛc. meiner gne-
digsten frawen.

Gnad vnd trost von Gott vnserm
vater vnd Herrn Ihesu Christo. Gnedigste fraw Königin/
ich hatte mir furgenomen/ durch frumer leute angeben **E.**
R.**M.** diese vier Psalmen zu zuschreiben / zur vermanung/
das **E.****R.****M.** solte frisch vnd frölich anhalten/ das heilige
Gotts wort ynn Hungernland zu foddern/ weil mir die gute
mehr zukamen/ das **E.****R.****M.** dem Euangelio gneigt were/
vnd doch durch die gottlosen Bisschoue (welche ynn Hun-
gern mechtig vnd fast das meiste drynnen haben sollen) seer
gehindert vnd abgewendet wurde/ also/ das sie auch etlich
vnschuldig blut haben vergiffen lassen/ vnd grewlich wid-
der die warheit Gottes getobet. Aber nu sich ynn des/ leider
die sache/ durch Gottes gewalt vnd verschung/ also gekeret
hat/ das der Turcke diesen iamer vnd elend hat angericht/
vnd das edle iunge blut König Ludwig **E.****R.****M.** liebes ge-
malh/ nyddergeschlagen/ hat sich mein furnemen auch müs-
sen umbkeren. Hetten nu die Bisschoue das Euangelion las-
sen gehen/ so muste izt alle welt vol geschreyes sein/ das sol-
cher fal vber Hungernland komen were/ der Lutherischen
kerzerey halben/ Welch ein lestern solt da worden sein? Wem
sie nu wollen die schuld geben/ mügen sie zusehen/ Gott hats
(als ich sehe) verweret/ das solch lestern keine ursache ent-
stunde.

Wie dem allen/ weil S. Paulus schreibt zum Römern/
das die heilige schrift sey eine tröstliche schrift vnd lere vns
gedult/ So hab ich dennoch fort gefaren vnd die selbigen
Psalmen lassen ausgehen **E.****R.****M.** zu trösten (So viel Gott
vns tröstet vnd gibt) ynn diesem grossen/ plötzlichen vnglück
vnd elende/

vnd elende/ damit der almechtige Gott **E. R. M.** zu dieser
zeit heimsucht/ nicht aus zorn odder vngnaden/ als wir bil-
lich sollen hoffen/ sondern zu züchtigen vnd zu versuchen/
auff das **E. R. M.** lerne trawen alleine auff den rechten va-
ter/ der ym hymel ist/ vnd sich trösten des rechten breutga-
mes Ihesu Christi/ der auch vnser bruder/ ia vnser fleisch
vnd blut ist/ vnd sich ergetzen/ mit den rechten freunden vnd
trewen gesellen/ den lieben engeln/ die vmb vns sind vnd vn-
ser pflegen/ Denn wie wol es **E. R. M.** ein bitterer schwerer
tod ist/ vnd billich sein sol/ so frue eine widwe/ vnd des lie-
ben gemalhs beraubt zu werden/ so wird doch widderumb
die schrift/ sonderlich die psalmen **E. R. M.** da gegen viel
guts trosts geben/ vnd den süßen/ lieblichen/ vater vnd son-
gar reichlich zeigen/ darynn das gewisse vnd ewiges leben
verborgen ligt. Vnd furwar/ welchem es da mag hin kom-
men/ das er des vaters liebe gegen vns ynn der schrift kan
sehen vnd fulen/ der kan auch leichtlich ertragen/ alle das
vnglück/ das auff erden sein mag. Widderumb/ Wer die sel-
bige nicht fulet/ der kan auch nicht recht frölich sein/ wenn
er gleich ynn aller welt wolust vnd freuden schwumme/ Es
kan ia keinem menschen solch/ gros vnfall widderfaren/ als
Gott dem vater selbs widderfaren ist/ das man sein liebstes
kind fur alle seine wunder vnd wolthat/ zu letzt/ verspeyt/ ver-
flucht vnd des aller schendlichsten tods am creutz tödtet/
wie wol ein iglichen sein vnglück das grosset dunckt/ vnd
mehr zu hertzen denn Christus creutz/ wenn er gleich zehen
creuze hette erlitten. Das macht/ wir sind nicht so starck von
gedult/ als Gott ist/ drum thun vns geringer creuze mehr
wehe/ denn Christus creuze. Aber der vater der barmherzi-
ckheit vnd Gott alles trostes/ wolte **E. R. M.** trösten ynn sei-
nem son Ihesu Christo/ durch seinen heiligen geist/ da sie dies-
ses elendes bald vergesse odder doch menlichen tragen kün-
de/ Amen. zu Wittemberg am ersten des Wintermonds.

1526.

E. R. M.

Williger diener
Martinus Luther.

Der sieben vnd dreysigst Psalm/

zu trösten die ienigen/ so vngedültig sind das die
gottlosen vbels thun vnd doch so lange vns
gestrafft ynn grossen glück bleyben.

- 1 Erzürne dich nicht vber den bösen /
Sey nicht neidisch vber den vbeltheter.



Se gleych zu greyfft

vnd triffte der prophet des herzen ge
dancken ynn dieser anfechtung/ vnd
hebt auff alle vrsach der selben/ vnd
spricht zum ersten/ O mensch du bist
zornig / hast auch vrsach / als dich
dunckt/ denn/ es sind böse menschen/
vnd thun vnrecht vnd viel vbels/
vnd gehet yhn dennoch wol/ das die

natur achtet redlich vrsach des zorns hie sein. Aber nicht als
so liebes kind/ las gnade vnd nicht natur hie regiern/ brich
den zorn/ vnd stille dich ein kleine zeit/ las sie vbel thun/ las
yhn wol gehen/ höre mich/ es sol dir nicht schaden. So
spricht denn der mensch/ ia wenn wirds denn auff hören?
wer mag die lenge halten? Antworttet er.

- 2 Denn wie das gras werden sie bald ab
gehawen werden/ vnd wie das grüne kraut
werden sie verwelcken.

Ein fein gleichnis ist das/ schrecklich den gleissnern vnd
tröstlich den leidenden/ Wie fein hebt er vns aus vnserm ges
sicht/ vnd setzt vns fur Gottes gesicht. Fur vnserm gesicht/
grunet/ blüet vnd mehret sich der gleisner hauff/ vnd bedeckt
alle welt gantz/ das sie allein etwas scheinen/ wie das grüne
gras die erden deckt vnd schmuckt. A iij Aber

Aber fur Gottes gesicht was sind sie? Herw/ das man
schier machen sol/ vnd yhe höher das gras wechst/ yhe neher
ym die senssen vnd herw gabeln sind. Also yhe höher/ weiter/
die bösen grunen vnd oben schweben/ yhe neher yhr vnterli-
gen ist/ Warumb woltestu denn zornen/ so yhr bosheit vnd
gluck so ein kurtz wesen ist. So sprichstu denn/ was sol ich
dieweil thun? woran sol ich mich halten bis das solchs ge-
schehe? Höre zu grosse verheissunge.

3 Hoffe auff den **HERRN** vnd thu guts/
bleibe ym lande vnd neere dich ym glauben.

Da nympt er alle vngedultige gedancken gantz dahin/
vnd setz das hertz zu ruge/ als solt er sagen/ liebes kind/ las
dein vngedult vnd fluche odder wunsche yhm nichts bö-
ses/ Es sind menschliche vnd böse gedancken. Setze dein hoff-
nung auff Gott/ warte was er draus machen wil/ gehe du
fur dich/ las vmb niemants willen gutes zu thun/ wie du an-
gefangen hast/ wo vnd welchen du magest/ vnd gib nicht
böses vmb böses/ sondern guts vmb böses.

So du aber auch dechtest/ du woltest fliehen vnd an ein
ander ort zihen/ das du yhr los wurdest vnd von yhn kamest.
Auch nicht also/ bleib ym lande/ wone wo du bist/ wechsel
odder wandel vmb yhrent willen nicht deine wonung odder
land/ Sondern neere dich ym glauben/ treib deine arbeit/
vnd handel wie vorhin/ hindern odder beschedigen sie dich/
vnd geben dir vrsach zu fliehen/ so las faren/ bleib ym glau-
ben/ vnd zweiffel nicht/ Gott wird dich nicht lassen/ Thu
nur das deine/ erbeite vnd neere dich/ vnd las yhn walten.

Solt nicht auff hören dich zu neeren/ ob sie dich an ei-
nem stuck hindern/ Gott/ so du hoffest/ gibt dirs am andern
ort/ wie er Abraham/ Isaac vnd Jacob thet/ die auch also
versucht worden. Hab deine

4 Hab deine lust am **HERRN**/ der wird
dir geben was dein hertz wundschet.

Das ist/ las dichs nicht verdriessen/ das Gott sie so leß
wolfaren/ las dir solchen seinen willen wol gefallen/ so ver-
geht dir die vnlust vber der gottlosen glück/ ia erlüste dich
drinnen/ als ynn dem aller besten vnd Gottlichen willen /
sihe/ so hastu diese tröstliche zusagung. Er wird dir geben
alles was dein hertz begeret / was wiltu mehr haben? Sihe
mir zu/ das du an stat des verdrieses so du von yhnen erschep-
ffest/ vbest diese lust vnd wolgefallen ynn Gottlichem wil-
len/ se werden sie dir nicht allein kein schaden thun/ sondern
dein hertz wird auch vol frids sein/ vnd frölich warten dieser
zusagung Gottes.

5 Befelß dem Herren deine wege vnd hoffe
auff yhn/ er wirds wol machen.

Nicht das du müßig soltest gehen/ sondern deine wege/
werck/ wort vnd wandel/ den befelß Gott/ kere dich an sie
nicht/ Denn es mus nicht Gott also befolhen werden/ das
wir nichts thun/ Sondern was wir thun/ obs von den gleis-
nern versprochen/ verschmecht/ gelestert odder verhindert
wird / sol man drum nicht weich werden noch ablassen /
Sondern ymmer fort faren/ vnd sie lassen yhren mutwillen
haben/ Gott die sache befolhen/ der wirds wol machen auff
beyden seitten/ was recht ist.

6 Vnd wird deine gerechtikeit erfur bringen wie
das liecht / Vnd dein rechte wie den mittag.

Dis ist die grössste sorge der weichlingen/ das sie ver-
drossen werden vber die gottlosen das yhre bosheit so scheis-
net vnd wol gehalten wird/ Denn sie sorgen/ yhr sache wer-
de verdruckt vnd verfinstert/ weil sie sehen der widder part
wüten so

wüeten so hoch faren vnd oben schweben/ Darumb tröst er
vnd spricht / Las sein liebes kind / das sie dich dein sache/
mit wolcken vnd platz regen verdrucken/ vnd ym ansehen
fur der welt/ gar zu nichte machen vnd ym finsternis begraben/
yhr sach empor schwebe vnd leuchte wie die Sonne/ Befilhestu
Gott deinen handel/ hoffest vnd wartest auff yhn/
so sey gewis/ dein recht vnd gerechtigkeit wird nicht ym finstern
bleiben/ Sie mus erfur/ vnd yderman so offentlich bekand
werden/ als der helle mittag/ das alle die zu schanden
werden die dich verdruckt vnd vertunckelt haben. Es ist nür
vmb's warten zu thun/ das du Gott ynn solchem furnemen/
durch dein zornen / vnmut / verdriessen nicht hinderst/
Drumb vermanet er aber ein mal.

7 Halt dem **HERRN** still vnd las yhn mit dir
machen/ Erzürne dich nicht vber dem man dem
es wol gehet/ vnd thut nach seinem mutwillen.

Als solt er sagen. Es wil dich verdriessen/ das du ynn
rechter sachen vnglück empfindest/ vnd ihenen ynn bosheit
wol gehet/ vnd wil nicht wie du gerne woltest/ von staten
gehen/ vnd sihest doch/ das dem vnrechten nach allem seinem
mutwillen gehet/ das ein sprichwort hieraus geflossen
ist/ yhe grösser schalck/ yhe besser glück. Aber sey weise liebes
kind/ las dich das nicht bewegen / halt auff Gott / deines
hertzen begird wird auch kommen / gar reichlich. Es ist aber
noch nicht zeit/ Es mus des schalcks glück vergehen vnd sei
ne zeit haben/ bis fur vber kumpt/ ynn des mustu Gott befehlen/
ynn yhm dich erlústen seinen willen dir gefallen lassen/
auff das du seinen willen ynn dir vnd ynn deinem feinde/
nicht hinderst/ wie die thun die nicht auff hören zu wueten/
sie haben denn yhr ding / entwedder mit dem kopff hin
durch/ odder zu drümmern bracht.

Er braucht hie ein fein Ebreisch wort. *Sile et formare ei.*
Schweig

Schweig vnd mach dich schickerlich/ gleich wie eine frucht
ynn mutter leib sich Gott machen leßt/ also bist ynn diesem
fal auch ynn Gott empfangen/ vnd er wil dich machen zu
rechter gestalt/ so du stil heltest.

8 Stehe ab vom zorn vnd las den grim/ Erzürne
ne dich nicht/ das du auch vbel thust.

Sihe wie vleissig warnet er/ das wir ia nicht böses mit
bösem vergelten/ noch den bösen folgen vmb yhres glücks
willen/ wie die natur pflegt zu treiben/ Vnd was hilfft solchs
er zorn? Es macht die sache nicht besser/ ia furet sie nür tiefer
ynn den schlam/ Vnd obs schon auffs aller beste geriete/
das du oben legest vnd gewünnest/ was hastu gewonnen?
Gott hastu verhindert/ damit sein gnade vnd gunst verlor
ren/ vnd den bösen vbelthettern bistu gleich worden/ vnd
wirfst gleich mit yhnen versterben/ wie folget.

9 Denn die bösen werden ausgerottet/ Die aber
des **HERRN** harren werden das land erben.

Es hilfft dich nicht/ das du nicht angefangen hast/ od
der gereizet seyest/ Denn es ist ein schlecht frey vrteil/ wer
vbel thut/ gereizt odder vngereizt/ der wird ausgerot wer
den/ Das sihet man auch fur augen ynn aller welt/ ynn allen
geschichten.

Aber wer auff Gott wartet/ der bleibt/ das neben yhm
vntergehet der vbelthetter/ wer nür so lange harren künd/
Die bösen menschen sind so gar reiff/ das sie niemand ver
treibet/ so mügen sie sich selbs nicht enthalten/ sie richten ein
mutwillig vnglück an vber yhren hals/ das sie zusehens ver
tilget/ Denn das reiff gras/ mus hew werden/ vnd solts an
yhm selbs auff dem stam verdorren. Es ist ein böser mensch
niemand so vntreglich vnd verderblich als yhm selbs/ das ses
hen wir an den mörden/ dieben/ tyrannen vnd der gleichen
exempel. **B** Es ist noch

10 Es ist noch vmb ein kleins / so ist der gott
lose nimmer / So wirstu auff seine stet acht
ten / vnd er wird nicht da sein.

Das verkleret / was droben gesagt ist / das sie sind wie
das gras / das schnell abgehawen wird / da mit vnser vngedult
gestillet werde / welche sich furcht / die gottlosen bleiben
zu lange. Mochtest aber sagen. Ja ich sehe wol / das die vn-
rechten gemeinlich lang bleiben / auch mit ehren zum grab
be komet.

Antwort / das geschicht gewislich darumb / das der an
der teil sich nicht nach diesem psalm gehalten hat / Sondern
die sache mit zorn / wueten / grimmen / klagen / vnd schreien
verhindert vnd verderbet hat / Darumb / weil niemand da
ist gewesen / der sein sach Gott befolhen hette vnd seines wil-
lens gewartet / so ist das vrteil des nehesten vorigen vers
vber beide teil gangen / vnd sind vertilget alle sampt / die do
vbel than haben. Were aber ein teil zu Gott bekeret / so were
doch das ander teil gewislich vnd eilend allein vnter gangen
wie dieser vers sagt.

Drumb sehen wir izt dieses psalmen exempel ynn der
welt nicht / Denn ein iglicher lest Got faren durch vngedult /
vnd vnterstehet sich mit rechten odder fechten zu schutzen /
damit wird Gott an solchem werck verhindert / das dieser
psalm von yhm preiset.

11 Aber die elenden werden das land erben /
vnd lust haben ynn grossen fride.

Dis bestetigt auch das droben ist gesagt / wie die gerech-
ten bleiben / nach dem verterben der vbelthetter. Nicht das
sie ewig auff erden bleiben / sondern das yhr sache zum ende
vnd friden mit ehren kumpt / auch auff erden / Welchen fride
sie mit leiden vnd gedult vnd ynnerlichem fride verdienet ha-
ben. Der gott

12 Der gottlose drowet dem gerechten /
vnd beisset seine zeene zu samen vber yhn.

Das ist aber zu trost den weichlingen gesagt / die der gottlosen toben nicht wollen leiden vnd verdreust / das sie Gott nicht bald strafft vnd so wol daz zu gehen lest. Ich nenn ne impium ein gottlosen / denn es heisset eigentlich den / der auff Gott nicht trawet noch glerobt / der aus yhm selbs vnd seinen freyen willen / noch ynn der natur lebt / als denn sonderlich sind / die gleisner / die gelerten vnd scheinende heiligen / als zu vnsern zeiten sind / Bapst / Bischoff / Pfaffen / Munch / Doctores / vnd des gleichen volcks / welch von natur müssen wueten widder das heilig Euangelium / als wir sehen das sie auch weidlich thun / Aber was hilfft sie yhr wueten vnd toben ? Hör was da folget.

13 Aber der HERR lachtet sein / Denn
er sihet das sein tag kompt.

Wie möcht vns ein stercker trost geben werden / das die wueten feinde der gerechten / alle yhre macht vnd bosheit fur wenden / meinen mit gantzen ernst den gerechten (das ist den glaubigen vnd Gott) mit zeenen zu reissen / vnd Gott sie so gar veracht / das er yhr lacht ? Darumb das er ansihet / wie kurz sie wueten werden / vnd yhr tag nicht ferne ist. Tücht / das Gott / wie ein mensch lache / sondern das es lecherlich ist anzusehen / ynn der warheit / das die töllen menschen so fast wueten / vnd gros ding furnemen / des sie nicht ein harbreit mügen ausrichten / Gleich als ein lecherlich narre were / der ein langen spies vnd kurzen degen nehme / vnd wolt die Sonnen von hymel erab stechen / vnd iauchzet ein mal drauff / als het er ein redlichen stich than.

14 Die gottlosen zihen das schwerd aus vnd
spannen yhren bogen / das sie fellen den
B ü clenden

elenden vnd armen / vnd schlachten die
so auffrichtig gehen ym wege.

Schwert vnd bogen heissen hie / die vergiftigen bösen
zungen / da mit sie lestern / schmehen / verkeren / verklagen /
vnd schenden / die sache des gerechten / auff das die frumen
ynn has / verfolgung / vnd zum tod mochten da durch komen
vnd vertilget werden.

Also spricht psalm. 34. Der menschen kind zungen sind
waffen vnd pfeyle / vnd yhr zungen ist ein scharffs schwert /
damit hawen sie nach dem gerechten / ob sie yhn fellen moch
ten / vnd schlachten (das ist) nicht alleine todten / sondern
nach yhrem mutwillen ynn yhm wülen vnd suddelen.

Er nennet auch die gerechten / den geringen vnd armen /
Darumb das sie fur dem grossen hochmüttigen schwulst
vnd blasen der gottlosen / veracht vnd geringe sind. Aber
was richten sie aus? Höre.

15 Aber yhr schwert wird ynn yhr hertz
gehen / vnd yhr bogen wird zubrechen.

Das ist / yhr böse wort müssen sie widder fressen / vnd
ewiglich dran erwürgen / das yhr gewissen ym sterben da
mit durch stochen / ewiglich wird gepeiniget / Dazu der bog
gen wird zubrechen / das alles vergeben ist / vnd sie nichts
ausrichten / mit alle yhrem wueten / denn das sie yhn selbs
solch vnglück zu richten ewiglich / das arme elend volck / Dar
umb sol sich yhres hassens vnd schendens niemant entsetzen /
Es mus also sein / das sie yhn selbs das bad ynn der helle wol
bereiten / wiewol die natur solch schwer lasterwort vngern
leidet / Doch der geist nach diesem psalm gericht / lachet yhr
mit Gott / vnd siehet auff yhr ende.

16 Es ist besser das wenige des gerechten /
denn das gros gut vieler gottlosen.

Das ist auch

Das ist auch verdrislich der natur/ das die gottlosen reich sind/ vnd yhr viel vnd mechtig/ aber der gerecht ist arm vnd alleine hat auch wenig/ vnd sie nemen yhm dazu das seine/ hindern yhn auch an narunge/ Darumb tröst der heilige geist sein liebes kind vnd spricht/ Las dichs nicht verdriessen das du wenig/ sie viel haben/ las sie hie reich vnd sat sein/ Es ist dir besser das du ein wenig habest mit Gottes gunst/ denn ob du grosse hauffen güter/ nicht allein eines/ sondern vieler vnd aller gottlosen hettest mit Gottes vngunst/ wie sie haben. Auch höre was fur ein vrtail gehet vber dein armut vnd yhren reichthumb.

17 Denn der arm der gottlosen wird zubrechen/
Aber der **HERR** enthalt die gerechten.

Der arm odder hand/ sind der anhang der gottlosen/ das yhr viel zu sammen halten/ vnd da durch sind sie gros/ mechtig vnd starck/ gleich wie izt des Papst arm/ sind die Könige/ Fürsten/ Bischoff/ Gelerte/ Pfaffen vnd Münche/ auff wilchs er sich verlesset/ vnd Gott nicht achtet.

Also hat ein iglicher gottlose den hauffen/ die geweltigen auff seiner seiten/ Denn reichthum vnd gewalt hat noch nie/ odder gar wenig/ auff des gerechten seitten gestanden. Aber was hilffts? Trawe nür Gott/ es mus alles zubrochen werden/ darffst dich darob nicht entsetzen noch dich verdriessen lassen/ Gott enthalt dich/ du wirst nicht versincken/ sein arm vnd seine hand ist vber dir/ vnd hat dich fest gefasset.

18 Der **HERR** kennet die tage der frommen/
vnd yhr erbe wird ewiglich bleiben.

Gott erkennet yhre tage/ yhr gelegenheit/ das ist/ dies weil sie yhm frey gleuben/ vnd nicht wissen wollen/ wenn vnd wie yhn zu helffen sey/ So nympt sich yhr Gott an/ vnd

B ij obs fur den

obs für den gottlosen scheint/ als hab yhr Gott vergessen/
so ist doch nicht also/ Gott weis wol wenn yhr zeit ist yhr
zu helfen/ wie auch psalm. ix. Gott ist ein helffer zur rechter
zeit/ vnd psal. xxxi. Meine zeit stehet ynn deinen henden. Als
solt er sagen/ Sie sind arm vnd wenig/ ihene sind reich vnd
mechtig/ Aber las gehen/ sie werden dennoch gnug haben
vnd keine not leiden/ Gots weis wol/ wenn es zeit ist yhr zu
helffen vnd radten/ welchem sie auch trawen/ on eygen hül-
ffe vnd radsuchen.

Dazu wird yhr erbe sein ewig/ nicht allein ynn ihener
welt/ sondern auch ynn dieser welt/ Denn sie werden vnd
müssen ymmer genug haben/ ob sie wol nicht vberflüssig vor-
rad haben/ wie die gottlosen/ Gott ist yhr vorrad vnd korn-
boden/ weinkeller vnd alle yhr gut/ Darumb auch folget.

19 Sie werden nicht zu schanden ynn der bösen zeit/
vnd ynn der theurung werden sie genug haben.

Wenn krieg odder theure zeit kompt/ so werden die alle
zu schanden/ die yhren trost haben auff yhre kornböden vnd
weinkeller odder gut gestellet/ denn es ist bald verschlungen
vnd vmbbracht/ So stehen sie denn vbel vnd mit schanden/
die zuuor so mütig vnd stolz gewesen sind. Aber die gerech-
ten/ weil Gott yhr trost vnd vorrad ist/ mügen nicht mangel
haben/ Es müsten ehe alle Engel von hymel komen vnd sie
speisen/ denn der vorrad lesset sie nicht mangeln dem sie
trawen/ widder zeitlich noch ewiglich. Wie aber die gottlo-
sen? Höre zu.

20 Denn die gottlosen werden vmbkomen/ vnd die
feinde des HERRN/ wenn sie gleich sind
wie eine köstliche awe/ werden sie doch alle
werden/ wie der rauch alle wird.

Das ist yhe nahe gered/ vnd verechtlich geurteilt die
grossen/ mechtigen/ reichen iunckern. Er spricht/ ob sie gleich
weren die

weren die aller reichste köstlichste arwe / da vbrig gnug ynnen
wüchse / wie sie denn auch sind / Denn sie haben gnug / sie sind
die guldene reiche arwe / ynn der welt / Dennoch müssen sie ver-
tergehen / ia vergehen / vnd alle werden / wie der rauch / Wo
sind sie / die zuvor gewesen vnd gros gut gehabt. Es ist yhr
keiner ynn gedechtnis. Aber die gerechten sind ynn guter ge-
dechnis vnd ynn allen ehren.

Darumb liebes kind / las sie reich sein wie sie wollen / sihe
auffs end / so wirstu finden / wie alles yhr ding ein rauch ist /
darumb das sie Gottes feinde sind / vnd yhm die seinen has-
sen vnd verfolgen / Da zu las dich das auch trösten / das er sie
nennet Gottes feinde / so doch bisher sie nür deine feinde ge-
nennet sind / Auff das du wissest / wie sich Gott dein also an-
nympt / das deine feinde / seine feinde sind.

21 Der gottlose borget vnd zalet nicht / der
gerechte aber ist barmhertzig vnd mild.

Das ist aber ein tröstlicher vnterscheid der güter / das
der gottlosen güter nicht allein vergänglich sind vnd ein en-
de haben / sondern auch böse güter sind vnd verdamlich / dar-
umb das sie nür auff hauffen gesamlet / vnd nicht den dürff-
tigen mit geteilt werden / welchs widder die natur der güter
ist.

Aber der gerechten gut hat nicht allein kein ende / dar-
umb das er Gott trawet vnd sein gut von yhm wartet / son-
dern ist auch ein recht nützlich gut / das andern wird mitge-
teilet / vnd nicht auff ein hauffen gesamlet / Also hat er gnug /
on allen zeitlichen vorrad / vnd gibt auch andern gnug / Das
heist ein recht gut. Hastu nicht viel / so ist doch göttlich vnd
nützlich / Die gottlosen haben viel / aber vnchristlich vnd vn-
nützlich.

Das er aber sagt / Der gottlose borget / ist nicht zuerste
hen / das die reichen von den menschen gut entlehnen / son-
dern es ist

Dem es ist gesagt/ym einer gleichnis vnd sprichwort/ Gleich
als der da viel borget vnd nicht zalet/ strebt darnach/ das er
nicht lange wil ym gut sitzen/ Also alle reichen vnd gottlos
sen/ empfahe viel von Gott/ sammeln vnd borgen von yhm/
vnd zalen yhn doch nicht/ das sie den dürfftigen austeilten/
dazu es yhn geben wird. Derhalben wird yhr gut ein böses
end nemen vnd wie der rauch vergehen/ Das dis die mei
nung sey/ beweiset das er sie gegenander helt/ den gottlosen
vnd gerechten/ der einer gibt der ander nicht/ vnd empfan
gen doch beyde von Gott.

Darumb ist des gottlosen empfahe vergleicht dem bor
gen vnd nicht bezalen. Aber des gerechten gut ist nicht bor
gen/ noch schuld/ sondern frey von Gott empfangen/ vnd
nützlich gebraucht/ yhm vnd seinem nehesten.

22 Denn seine gesegneten erben das land /
aber seine verfluchten werden ausgerottet.

Sihe da/ Er nennet die gottlosen reichen/ Gottes ver
maledeyeten/ vnd die gleybigen Gottes gebenedeyeten/ auff
das dich ia nichts verdriesse/ noch deinem glauben hyndere/
yhr gros gut vnd dein armut/ Was wiltu mehr? Ist das
nicht trosts gnug zur gedult? Hastu nicht vberflüssig wie sie
haben/ so wirstu dennoch gnug haben/ vnd das land besitz
en.

Nicht das du ein herr der welt seyest/ sondern du wirst
gutes gnug haben auff erden/ vnd ym lande wonen mit gu
tem fride/ Denn Gott gebenedeyet dich zeitlich vnd ewiglich
darumb das du yhm trawest/ ob du wol von den gottlosen
vermaledeyet vnd beschedigt wirst/ Widderumb/ die gott
losen reichen/ ob sie itz ein zeit lang vberflüssig haben/ so wer
den sie doch versterben/ vnd nicht ym land vnd gut bleiben
sitzen/ Sie werden gewislich ausgeschüpfft vnd ein ander
drein gesetzt/ Darumb das sie Gott vermaledeyet vnd yhn
entzeucht seine gnade/ zeitlich vnd ewiglich/ Denn sie gley
ben nicht

ben nicht an yhn/ob sie wol von menschen gebenedeyet vnd begabt werden. Darumb wo die gerechten sind/da haben sie gnug auff erden/vnd bleiben ym gut sitzen/ Widderumb die gottlosen werden ausgewurtzelt wo sie sitzen ynn gütern/ Das beweisen alle Fürstenthumb/ Reich vnd grosse güter/ die wir sehen/wie sie hyn vnd her faren von einem geschlechte zum andern.

Sihe/ so hastu das vrteil vber die zeitlichen güter/ das kürtzlich beschlossen ist/ der gerechte mus gnug haben/ vnd der vngerechte verderben/ darumb das der gerechte Gott trawet vnd der güter wol braucht/ der gotlose trawet nicht/ vnd braucht yhr nicht wol.

Also lesen wir/ das Abraham vnd Lot reich waren/ vnd gerne herbergeten die pilgerin/ Darumb/ ob sie wol kein eygen land vnd vorrad hatten/ dennoch blieben sie ym lande sitzen vnd hatten gnug.

23 Von Gott werden des mans genge gesoddert/ vnd hat lust an seinem wege.

Sihe da aber mal trost. Nicht allein wirstu zeitlich guts gnug haben/ sondern alles was du thuest/ dein gantz leben vnd wandel/ auch gegen die gottlosen/ wird schleimig sein vnd fortgehen/ Darumb das du Gott trawest vnd yhm dich vnd deine sache ergibst/ ynn gantz deinem leben yhm gelassen stehest/ Damit machstu/ das er gefallen/ lust/ vnd gleich ein begird hat/ deinen weg vnd wandel zu foddern.

Aber da gegen sichtet nu/ das solcher Gottgefelliger weg nicht gesoddert ia verhindert vnd verworffen wird von den gottlosen/ das verdreust denn die natur/ Darumb mus man sich hie trösten/ das Gott gefellet/ vnd von yhm gesoddert wird vnser wesen/ nicht ansehen die hyndernis vnd verwerffung der gottlosen.

24 Fellet er / so wird er nicht weg geworffen /
Denn der **HERR** erhelt yhn bey seiner hand.
C Das fallen

Das fallen möcht verstanden werden/ das der gerechte
zu weilen sundigt/ aber stehet widder auff/ wie Salomon
sagt. Aber das lassen wir igt faren/ vnd bleiben auff der ban/
das fallen hie heisse so viel/ als ob er ein mal vnterlige/ vnd
die gottlosen obligen/ als David/ da er von Saul vnd Absa-
lon geiagt ward/ vnd Christus da er gecreuzigt ward/ Denn
solchs fallen weret nicht lang/ Gott lest yhn nicht ligen vnd
weg geworffen sein/ sondern ergreiffte seine hand/ richt yhn
widder auff/ das er mus bestehen.

Damit tröstet der geist vnd antworttet den heimlichen
gedancken/ die yemand möchte haben/ vnd bey yhm selbs sa-
gen. Ja ich habe dennoch etwan gesehen/ das der gerechte
hat müssen vnterligen/ vnd ist seine sache gar ynn die aschen
gefallen fur den gottlosen. Ja spricht er/ liebes kind/ las das
auch sein. Er falle/ aber er wird dennoch nicht so ligen blei-
ben vnd verworffen sein/ Er mus widder auff/ ob schon alle
welt dran verzweyffelt habe/ denn Gott erwischet yhn bey
der hand/ vnd hebt yhn widder auff.

25 Ich bin iung gewesen vnd alt worden/ vnd hab
noch nie gesehen den gerechten verlassen/ odder
seinen samen nach brod gehen.

Sihe/ da setz er zu mehrer sicherung/ sein eygen erfah-
rung/ vnd ist auch war/ die teglich erfahrung gibts/ vnd müs-
sen bekennen alle menschen/ das es also sey/ Wird aber ye-
mand verlassen das er brod suchen mus/ so ist es gewis/ das
es yhm am glauben gebrochen hat/ darumb er auch recht
vnd billich verlassen ist.

Aber dis brod suchen/ odder nach brod gehen/ mus man
verstehen also/ das er nicht hunger leide/ odder hungers ster-
be/ ob er wol arm ist/ vnd wenig zuvor hat/ Er wird gewis-
lich ernceret/ ob er nichts vbrigs hat bis auff den andern tag/
Gibt yhm einer nicht/ so gibt yhm der ander/ Es mus seine
nahrung

narung gewislich komen / wie wol die sundigen die yhm
nicht geben vnd helffen.

Denn der arme Lasarus Luce. 16. ob yhm der reiche
man nichts gab / ist er dennoch erneeret worden / obs wol
mit armut zu gieng. Armut nympt Gott nicht von seinen
heiligen / aber er lest sie nicht vntergehen / noch versterben.

26 Teglich ist er barmhertzig vnd leihet /
vnd sein same wird gesenet sein.

Das ist von dem habenden gerechten gesagt / ob er also
sey das er kinder habe / so der selb schon austeilet / gibt vnd
leihet teglich / dennoch wird er vnd sein kind gnug haben /
Denn die benedeiung ist / das sie werden gnug haben / hie
vnd dort / gar keinen mangel leiden an leibs narung vnd der
seelen heyl / obs wol zu weilen nicht vberig ist.

Also haben wir / wie Gott die glaubigen handelt / ym
zeitlicher narung vnd yhren sachen / das wir ia sicher sein
ym beyden stücken / Er wird vns nicht verlassen / vnd wer
den dazu gnug haben an der narung / Vnd also gehet es auch
gewislich / so wir glauben / vnd vns der gottlosen glück nicht
verdriessen noch bewegen lassen / Darumb widerholet vnd
schleust er abermal / vnd spricht.

27 Las vom bösen vnd thue guts /
vnd bleibe ymmer dar.

Als solt er sagen / las Gott sorgen / thue nür du was gut
ist / vnd las dich niches bewegen böses zu thuen / Bleib nür
wie du bist ymmer dar / vnd las gehen was da gehet / wie
auch S. Peter sagt. Werfft auff yhn alle ewer sorge / denn
er tregt sorge vber vns / Vnd psal. 55. Wirff all dein anli-
gen auff Gott / vnd er wird dich wol beschicken odder besor-
gen / vnd nicht lassen ewiglich bewegen.

E ij

Denn der

28 Denn der **HERR** hat das recht lieb vnd verlest seine heiligen nicht / ewiglich werden sie bewaret / aber der gottlosen samen wird ausgerottet.

Darffst nicht sorgen / das dein recht vntergehe / es ist nicht müglich / Denn Gott hat recht lieb / darumb mus es erhalten / vnd die gerechten nicht verlassen werden / Wenn er ein abgott were / der vnrecht lieb hette odder dem rechten feind were / wie die gottlosen menschen / so hettestu ursache zu sorgen vnd dich zu furchten.

Aber nu du weist / das er das recht lieb hat / Was sorgest du ? Was furchtestu ? Was zweyfelstu ? Ewiglich / nicht allein zeitlich / werden seine heiligen erhalten / vnd die gottlosen mit kind vnd allem dem yhren ausgerottet. Die heiligen alhie / heissen nicht die ym hymel sind / von welchen die schrift selten redet / Sondern gemeiniglich von denen / die auff erden leben / die da gleuben ynn Gott / vnd durch den selben glauben / Gottes gnad vnd geist haben / dauon sie heilig genennet werden / als wir alle sind / so wir gleuben warhafftig.

29 Die gerechten erben das land / vnd bleiben ewiglich drynnen.

Das ist / wie droben gesagt ist / Sie haben gnug auff erden / dürffens nirgend denn bey Gott gewarten / wo sie wonen ynn der welt / Denn Gott lest sie nicht / Lest er sie aber / so sind sie gewislich vnrecht vnd gottlos / on glauben vnd trawen ynn Gott. Vnd also ist das beschlossen / das wir nür gut thuen / vnd bleiben auff der ban vnd ym lande / lassen yhn sorgen vnd machen. Tu folgt was die sache sey des gerechten / darob solchs wesen sich erhebt / zwischen yhnen vnd den gottlosen.

30 Der mund des gerechten gehet mit weisheit vmb / vnd seine zunge redet vom gericht.

Darüber

Darüber hebt sich der hadder / Die Gottlosen wollen die Göttliche weisheit vnd recht nicht hören / verfolgen / verdammnen vnd lestern es für nartheit vnd vnrecht / vnd gehet den selben schelcken eine weile wol drob / Das verdreust denn vnd bewegt natürlich den gerechten / vnd werden da durch gereizet zum bösen vnd widdergelten odder vngedult.

Darumb leret sie dieser Psalm stil halten / vnd ymmer fortfaren / ymmer lernen / tichten vnd reden solche weisheit vnd recht / Gotte die sache befehlen / ihene lassen beissen / wüeten / zeene knirschen / lestern / schlagen / schwerd blösen / bogen spannen / sich heuffen vnd stercken. zc. wie gesagt ist / Denn Gott wirds wol machen / so wir sein nür gewarten / vnd ymmer auff der ban bleiben / vnd vmb yhren willen nicht auffhören odder nachlassen guts zuthuen. Es mus doch zu letzt das vrs teil dieses verses bleiben vnd kund werden wie der helle mit tag / das der gerechte hab recht vnd weislich gered / die gottlosen sind narren vnd vnrecht gewesen.

31 Das gesetz seines Gottes ist ynn seinem hertzen / Seine tritt gleitten nicht.

Darumb redet er recht / vnd tichtet weisheit / das Gottes gesetz / nicht ynn dem buch / nicht ynn den ohren / nicht auff der zungen / sondern ynn seinem hertzen ist. Gottes gesetz mag niemand recht verstehen / es sey yhm denn ym hertzen / das ers lieb habe vnd lebe darnach / welchs thut der glaub ynn Gott. Darumb / ob die gottlosen wol viel wort machen von Gott vñ seinem gesetze / rhümen sich der schrift lerer vnd erfarnen / so reden sie doch nymmer recht / noch weislich / denn sie habens nicht ym hertzen / darumb verstehen sie sein nicht / Es betreugt sie der schein / das sie die wort vnd schrift furen / vnd drob wüeten vnd verfolgen die gerechten.

Item des gerechten tritt schlipffern nicht / sondern gehen gewis frey einher ynn gutem gewissen / darumb das er

C iij Der sach

Der sach gewis ist / vnd mag nicht verführet werden durch
menschen gesetz vnd nebenleren. Aber die gottlosen fallen
vnd schlipffern allzeit hyn vnd her / haben keinen gewissen
trit / Darumb das sie Gottes gesetz auffser dem glauben nicht
recht verstehen / Vnd also faren sie hyn vnd her / wie sie yhr
düncfel furet odder menschen gesetz leret / yzt dis / yzt ihenes
werck / yzt leret man sie sonst / yzt so / vnd schlipffern hin / wo
man sie hin furet mit der nasen / ein blinder den andern / Dar
umb wie sie nicht recht verstehen / so wandeln sie auch nicht
recht. Noch wüten sie vmb solch yhr schlipffferig lere vnd le
ben / widder die gewisse lere vnd leben der gerechten / wollen
yhe yhr ding allein bestetigen.

32 Der gottlose sibet auff den gerechten /
vnd gedencet yhn zu tödten .

Es verdreust yhn vnd kans nicht leiden / das man seine
lere vnd leben strafft / als ein vnrecht vnweislich wesen / dar
umb dencket er nicht mehr / denn wie er seine sache befestige.
Nu kan er fur dem gerechten nicht / welcher lest sein vnrecht
nicht vngestraft / Darumb treibt yhn sein falsches wesen da
hyn / das er des gerechten los wird / yhn vmbbringe / damit
sein wesen recht vnd vngestraft bleibe. Wie der Papsst vnd
die seinen allzeit vnd noch thuen / die wir wol sehen / das sie
Gottes gesetz auch schier nicht ynn den büchern haben /
schweig denn ym hertzen. Noch wollen sie die sein / die da
weisheit richten vnd recht leren / wüten vnd rasen drüber wie
die tollen hunde / on auff hören.

33 Aber der **HERR** lest yhn nicht ynn
seinen henden / vnd verdampt yhn nicht
wenn er verurtheilet wird .

Gott lest den gerechten wol ynn yhr land komet / er ver
lesset yhn aber nicht drinnen / Sie mügen yhn nicht demp
ffen / wenn sie yhn gleich tödten / dazu hilfft yhr vrtail nicht /
ob sie gleich

Ob sie gleich rhümen/sie thunes an Gottes stat vnd ynn Gottes namen/ denn Gott richtet das gegen vrteyl. Das sehen wir auch zu vnsern zeiten/ Der Papsst mit den seinen habent Johannem Huss verdampft/ noch hüfft sie kein verdammen/ kein schreyen/ kein plerren/ kein wüten/ kein toben/ kein bulle/ kein bley/ kein sigel/ kein ban/ er ist erfor blichen allzeit/ Da kein Bischoff/ kein Vniuersitet/ kein König/ kein Fürst et was widder vermocht/ welchs noch nie von keinem Ketzer gehört ist/ Der einige todte man/ der vnschuldige Abel/ macht den lebendigen Kain den Papsst mit allem seinem anhang zu Ketzer/ abtrynnigen/ mörden/ Gottes lestern/ solten sie sich drob zu reissen vnd bersten.

34 Harre auff den HERRN vnd beware seinen weg/ so wird er dich erhöhen das du das land erbest/ wenn die gottlosen ausgerottet werden/ wirstu sehen.

Abermal vermanet er auff Gott zu trawen vnd guttes thun/ darumb das die vngebrochene blöde natur sich schwerlich ergibt vnd auff Gott erweget/ das sie gewarte/ das sie nyrgend sibet noch empfindet/ vnd sich des eufere/ das sie sichtiglich empfindet.

tu ist auch gnugsam gesagt/ wie die besitzung des landes zuuerstehen sey/ nemlich/ Das ein gerechter bleibt vnd genug hat auch auff erden/ dazu wo er zu wenig hat zeitlich/ hat er deste mehr geistlich/ wie Christus leret vnd spricht. Wer einerley verlesset/ der sol es hundertfeltig widder haben auff dieser welt/ vnd dazu das ewige leben. Wie wol ich nicht widder fechte/ das solchs erden besitzen möcht verstanden werden/ nicht von einem iglichen gerechten ynn sonderheit/ sondern von dem hauffen vnd der gemeine/ ob wol villeicht etliche zeitlich vertilget werden/ dennoch zu letzt yhr same vnd lere oben bleibt/ wie die Christen ynn der welt blieben sind/ vnd nie vergangen/ ob yhr wol viel von den Heyden zeitlich gemartert vnd vertilget werden/ wie psalm. 111. auch sagt. Selig

sage. Selig ist der man der Gott fürcht/ vnd an seinen gepotten lust hat. Sein same wird regieren auff erden / vnd das geschlecht der gerechten wird vermehret werden. zc.

Doch wie gesagt/ vber das alles hat ein iglicher auch für sich selbs gnug/ vnd Gott gibt yhm auch was er darff vnd bittet/ vnd wo ers nicht gibt/ da ist gewislich der gerecht so willig/ das ers nicht haben wil von Gott / vnd weret Gott das ers yhm nicht gebe/ so gar eins ist er mit Gott/ das er hat vnd nicht hat/ wie er nür wil für Gott/ wie Psalm. 145. sagt. Gott thut den willen der/ die yhn fürchten/ vnd erhöret yhr bitten vnd hilfft yhnen.

Das er hie sagt / Du wirst sehen wenn die gottlosen ausgerottet werden/ ist nicht von einem schlechten sehen gesagt/ sondern nach dem brauch der schrift heisset es sehen nach seinem willen/ odder das er lengest gerne gesehen hette/ wie wir auff deudsch sagen/ das wolt ich gerne sehen. Auff die weise sagt Psalm/ 54. Du hast mich aus allem vbel erlöset vnd meine augen haben gesehen meine feinde/ das ist/ Ich hab meinen willen an yhn gesehen/ das ich erlöset vnd sie vertilget sind. Item Psalm. 112. Der gerechte wird nicht bewegt werden/ bis das er sehe seine feinde. Item Psal. 91. Du wirst mit deinen augen sehen/ vnd die straffe der gottlosen wirstu schauen.

Widderumb von den feinden sagt Psalm. 35. Sie haben yhren mund weit auffgethan vnd gesagt/ Ey ia/ Ey ia/ vnser augen haben gesehen/ das ist/ er ligt darnider/ es ist geschehen das wir lengest gerne gesehen hetten. So auch Michas/ Aspiciat in zion oculus noster/ O das vnser auge sehen möchten ynn zion/ das ist/ O das zion vber gieng das wir gerne sehen. Also hie auch/ du wirst sehen was du gerne gesehen hettest/ wenn die gottlosen ausgerottet werden/ Die se weise zu reden ist fast gemein ynn der schrift.

Ich sahe

35 Ich sahe einen gottlosen mechtig / vnd eingewurtzelt wie ein grünender lorber bawm.

Hie setzt er die ander erfahrung zu einem exempel vnd zeichen vom gottlosen / Droben hat er eine erfahrung gesagt vom dem gerechten / das er noch nie keinen hab sehen verlassen / Hie sagt er eine erfahrung vom widdertheil / von dem gottlosen wie der vergangen sey vnd spricht / Er war reich / mechtig / gros / das sich yderman fur yhm fürchte / vnd was er sagt / thet / lies / das war gesagt / gethan / gelassen / Denn ein solches en bedeut das Ebreisch wörtlin / Ariz / das ich hab verdenkscht / mechtig. Das bedeut auch das er dazu thut. Er brüstet sich vnd war fürdrechtig / thet sich erfür / war etwas sonderlich für allen / macht sich breyt vnd hoch / Gleich wie ein Lorberbawm für andern bewomen allzeit grunet / vnd etwas sonderlich pranget für allen / sonderlich für den zambewomen oder der garten bewomen / Ist auch nicht ein schlechter pusch oder der niedriger bawm / des man auch warten vnd pflegen mus / welchs man den wilden bewomen vnd Cedern nicht thuet / Also mus man auff diesen gottlosen iunckern auch sehen vnd sprechen / Gnediger herr / lieber iuncker.

36 Da man für vber gieng / sihe / da war er dahyn / Ich fraget nach yhm / da ward er nyrgend fundē

Solch exempel hat Dauid / an dem Saul / Achitophel / Absalom / vnd der gleichen wol gesehen / welche mechtig waren ynn yhrem gottlosen wesen / Vnd ehe man sich umbsah / waren sie dahin / das man fragen vnd sagen möchte / Wo sind sie hin ? Ist's nicht war ? zu vnsern zeiten ist der Papst Julius auch ein man gewesen / Welch ein Ariz vnd gewolich er herr war das ? Ist er aber nicht verschwunden ehe man sich versach ? Wo ist er nu ? Wo ist sein trogen vnd prachten ? Also sollen wir nür still halten / Sie werden alle also verschwinden / die yzt wüten / vnd wollen den hymel zurstörens
D vnd fels

vnd selbs vmb stossen/ Last vhs nur schweigen ein wenig/
vnd fur vber gehen/ wir werden vns schier vmbsehen/ vnd
yhrer keinen sehen/ so wir nur Gott trawen.

37 Beware die frömkeit vnd schaw was auffrichtig
ist/ Denn zu letzt wird der selbe fride haben.

Das ist so viel gesagt/ als Paulus Tit. 2. Sey nur recht
schaffen ym einfeltigen glauben zu Gott/ vnd wandel auff
richtig vnd redlich/ darauff sihe allein/ vnd richte dich dar
ein/ las gottlosen gottlosen sein/ Sihe/ so wirstu zu letzt fride
haben vnd wird dir wol gehen. Die Ebreische sprache hat
die art/ das/ wo wir auff deudsch sagen/ Es gehet yhm wol/
Er gehabt sich wol/ Es stehet wol vmb yhn/ vnd auff Lati
nisch/ Valere/ Bene habere. zc. das heist sie fride haben.

Also Gene. 37. sprach Jacob zu seinem son Joseph/ Ge
he hin ym Sichern zu deinen brüdern/ vnd sihe ob yhn fride
vnd dem viche fride sey/ vnd sage mir widder/ das ist/ obs
yhn auch wolgehe/ Daher kompt der grus ym Euangelio/
auff Ebreische weise/ Pax vobis/ fride sey euch/ welchs wir
auff Deudsch sagen/ Gott gebe euch einen guten tag/ guten
morgen/ guten abent. Item ym abscheiden sagen wir/ Ge
habt euch wol/ habt gute nacht/ lasts euch wol gehen/ das
heist/ Pax vobis. Also wenn der gottlos dahyn ist/ so gehet
es dem gerechten vnd gleubigen wol/ vnd ist hernacher eitel
fride.

38 Die vbertreter aber werden vertilget mit einan
der/ vnd die gottlosen werde zu letzt ausgerottet.

Das ist das widderspiel/ die gerechten bleiben vnd ge
het yhn wol/ die abtrünnigen gehen vnter vnd gehet yhn
vbel hernach vnd zu letzt.

Es möchten diese zween vers auch wol verstanden wer
den von beider teilen nachgelasnen leeren erben vnd gütern/
Das die meinung sey/ die gerechten was sie hinder sich lassen
das bestehet

Das bestehet vnd gehet yhn wol/wie droben ym. 26. vers ges
sagt ist/ das des gerechten kinder auch gnug werden haben.
Aber alles was die gottlosen hinder sich lassen/ verschwind
vnd kompt zusehens vnter/ wie Psalmo. 109. sagt/ Sein ges
dechnis sol ynn einem gliede des geschlechts vertilget wer
den/ Das sihet man auch teglich ynn der erfahrung.

39 Das heil aber der gerechten ist von dem **HERR**
EN/ Der ist yhre stercke ynn der zeit der not.

Ursach der vorigen zween vers ist/ Denn das heyl der
gottlosen ist von yhn selbs / vnd yhr sterck ist yhr eygen
macht/ Sie sind gros/ viel/ reich vnd mechtig/ dürffen Got
tes sterck vnd heyl nicht. Aber die gerechten/ die yhr gesicht
müssen abetren von allem das man sihet vnd fulet/ vnd als
lein Gott trawen/ die haben kein heil noch sterck denn von
Gott / Welcher lesset sie auch nicht/ vnd thut wie sie yhm
glauben vnd trawen/ als dieser folgend letzte vers beschleust
vnd sagt.

40 Vnd der **HERR** wird yhn bey stehen/
vnd wird sie erretten/ vnd wird sie von
den gottlosen erretten vnd yhn helffen/
Denn sie trawen auff yhn.

Sihe/ sihe/ welch ein reiche zusagung/ grosser trost/ vnd
uberflüssige ermanung ist das/ so wir nür trawen vnd glau
ben: zum ersten/ Gott hilfft yhn/ nemlich/ mitten ynn dem
vbel/ lesset sie nicht allein drynnen stücken/ ist bey yhn/ sterckt
sie vnd enthelt sie/ Ober das/ nicht allein hilfft er yhn/ son
dern errettet sie auch/ das sie eraus komen/ Denn dis Ebre
isch wörtlin heyst eygentlich/ dem vnglück entlauffen vnd
dauon komen. Vnd das die gottlosen verdriessen möchte/ so
drückt er sie mit namen aus vnd spricht/ Er wird sie erretten
von den gottlosen/ obs yhn wol leyd sey/ vnd sol yhr wüten
sie nichts helffen / wie wol sie meinen der gerechte sol yhn
nicht entlauffen/

nicht entlauffen/ er müsse vertilget werden.

Zum dritten/ Nicht allein errettet er sie/ sondern hilfft yhn auch förder ymmer dar/ das sie hin furt ynn kein vnglück bleiben/ es kome wenn es wil/ Vnd das alles darumb/ das sie yhm vertrawet haben. Also spricht er auch Psal. 91. Darumb das er mir vertrawet/ so wil ich yhn erretten vnd beschirmen/ denn er erkennet meinen namen/ Er hat mich angeruffen/ darumb wil ich yhn erhören. Ich wil bey yhm sein ynn seinem vbel/ vnd wil yhn craus reissen/ vnd wil yhn zu ehren setzen/ vnd yhn fullen mit lenge der tage/ vnd yhm offenbarn mein heil.

O der schendlichen vntrew/ mistrew/ vnd verdampften vnglaubens/ das wir solchen reichen/ mechtigen/ tröstlichen zusagungen Gottes nicht glauben/ vnd zappeln so gar leichtlich/ ynn geringen anstößen/ so wir nür böse wort von den gottlosen hören. Hilf Gott/ das wir ein mal rechten glauben vberkomen/ den wir sehen ynn aller schrift gesoddert werden/ **A M E N.**

Der zwey vnd sechzigst Psalm.

Der Titel.

Ein Psalm Davids für Jeduthun
hoch zu singen.

DAs ist/ Dieser Psalm ist gemacht von David/ vnd also geordenet/ das er von dem Senger Jeduthun vnd von seinen gesellen gesungen würde/ ynn der höhe/ das ist mit heller stimme/ wie wir denn lesen ym ersten buch der Chronica/ das David etliche senger verordente hoch zu singen/ mit hellen cymbalen odder schellen/ etliche aber nydrig zu singen mit harffen für der gülden laden/ Vnd hat also auff iglichen Chor sonderliche Psalm gemacht vnd machen lassen. **Meine**

1 Meine Seele schweiget Gott / Denn
von ihm kompt mein heyl.



Dauid war ein wolgeüb-
ter vnd erfarnier man / als der ym hofe
des Königes Saul erzogen vnd ver-
sucht / manche böse tücke gesehen hat-
te / wie die hofe iunckern dem Könige
heuchelten vmb gelt vnd ehre willen /
vnd alle yhren trost auffss Königs gna-
de stelleten / vnd yhm zu lieb thetten /

alles was er wolt / es were widder Gott odder menschen /
Derhalben er auch gar viel böser tücke von yhm erleiden mu-
ste / da sie sahen / das yhm der König selbs feind war / vnd töd-
ten wolt / Gleich wie Herodes den Juden zugefallen / Petron
fieng vnd die Christen verfolgete. Wie wir auch noch yzt
ynn herrn höfen sehen / vnd alle zeit gewesen ist / das die ho-
feshrantzten vnd synantzer / wenn sie nür sehen / was den fur-
sten vnd herrn gefelt / vnd hoffnung da ist / etwas zu ersch-
nappen / thuen vnd reden sie getrost / was sie dünckt es gefal-
le / Gott gebe / es gehe drüber der arm odder gerechte vnter
odder bleibe oben / das sie nür reich vnd hoch werden. Ja es
geschicht solchs nicht allein ynn herrn höfen / sondern ynn
allen stenden der welt / Denn es ist der welt laufft vnd weise /
die bleibt also / das man heuchelt vmb genies willen / vnd auff
menschen gunst vnd hülffe sich verlest / vnd darüber Gott
veracht vnd dem nehesten schadet / daneben dennoch from
sein wollen / thüren auch Gottes wort vnd alle gerechticheit
trefflich rhümen / als weren sie die aller besten.

Widder solche gottlose buben hat Dauid diesen psalm
gemacht / zur heilsamen lere vnd warnung / darynne er
vns leret / nicht auff die menschen sich zuverlassen / wenns
gleich herrn vnd Könige weren / sondern allein auff Gott.

D iij

Vnd warnet

Vnd warnet vns / denn es nympt kein gut ende / Wie er auch
am. 146. Psalm spricht / Last euch nicht auff Fürsten / auff
menschen Kinder / Er kan doch nicht helffen / denn sein geist
mus ausfaren / vnd widder zu seiner erden komen / als denn
sind verloren alle deine anschlege. Als solt er sagen / Wenn
gleich menschen gunst allenthalben ym leben bestendig were
(welchs doch auch nicht ist / denn heute freund / morgen
feind / vnd wie man ynn sonderheit von Fürsten sagt / Für
sten gnad April wetter) so ist doch yhr leben keine stunde ge
wis / Warumb verlessestu dich denn auff sie vnd verachst
ymb yhren willen Gott / der ewig bleibt / vnd thust so böse
tücke widder yhn vnd deinen nehesten? Also setzt er sich hie
selbs zum exempel / als der zur zeit Saul viel gesehen hat / die
sich auff Saul verliessen / vnd ymb seinen willen thetten / was
Gott vnd menschen verdros / Aber da Saul tod war / mit
allen schanden bestunden / wie der son Doeg / welcher nach
dem tod Saul kam vnd wolte Dauid heucheln / er hette Saul
erwürgt. 2. Reg. 2.

Darumb spricht er hie / Mir nicht / das ich meinen trost
auff Fürsten odder menschen setze / wie die gottlosen hofes
schranzen thuen / Ich wil auch gerne dem Könige gehorsam
sein / yhm dienen / sein bestes suchen vnd foddern / wil helffen
vnd radten / mit leib vnd gut yhm beystehen / Aber das ich
mich auff yhn solt verlassen / das er mich reich / herlich odder
selig machte / das wil ich lassen / Denn morgen solt sichs wet
ter wol umbkeren / das er mich verfolgete (wie denn auch ge
schach / das Dauid zu erst der liebste diener Sauls war / dar
nach der aller feind seligste / vnd muste auch erfahren / das Für
sten hulde April wetter were / sonderlich wenn es nicht gott
furchtige / sondern gottlose Fürsten sind / Wenn ich als denn
hette ymb meines herrn odder eines menschen willen / wid
der Gott vnd menschen gethan / wo wolt ich bleiben / so Got
vnd menschen erzürnet vber mich weren? Es were mir lieber
weg Fürsten vnd menschen gunst / vnd bleibe mir Gottes hul
de. Bleibe

de/ Bleibt mir Gottes hulde/ so wird sich menschen hulde
wol finden/ Sind sie sich nicht/ so fare sie zum teufel/ Gottes
hulde ist mir gnug. Verliere ich aber Gottes hulde/ so bleibt
mir zu letzt menschen hulde auch nicht/ so fare denn ich zum
teufel sampt meinen Fürsten/ beyde mit Gottes vnd menschen
en vn hulde/ Da hab ichs denn fein troffen vnd wol gemacht.

Das er sagt/ Meine seele schweige Gott/ ist Ebreisch ge
red/ Da lauts also/ Meiner seelen schweigen ist gegen odder
zu Gott/ Das ist/ Ich schweige vnd drücke mich vnter den
gottlosen/ die sich auff menschen vnd herrn verlassen/ poche
en vnd trozen/ Aber ich befelh mich Gott/ poche vnd troze
auff den selbigen gar heimlich vnd stille/ das sie es nicht wis
sen/ vnd halten mich für einen narren/ das ich nicht auch er
aus fare vnd getrost mit heuchele vnd gelt suche. O welch
ein seltsam gesinde ists vmb einen solchen hofediener/ Voch
hat Saul der böse König einen solchen gehabt/ Vnd ist Da
uid/ als eine rose vnter den dornen/ vnter solchen gottlosen
hofebuben gewest/ wie on zweiffel auch noch wol sein kan
ein frum mensch zu hofe/ Aber er mus freylich vnter den dor
nen auch sein/ vnd der stacheln alle zeit gewarten.

Denn von yhm kömpt mein heyl/ spricht er/ Das ist/ lie
ber/ es wird mir niemand helffen/ denn Gott/ der ist gewis/
Von yhm/ Von yhm heists/ Von yhm/ kömpt mir mein heil/
das ist alle mein glück/ reichthumb/ wolfart/ vnd was ich ha
ben sol vnd bedarff/ Die gottlosen sprechen aber also/ Mein
heiligster vater Bapst/ Mein aller gnedigster herr Keiser/
Mein gnedigster herr König zu Franckreich/ Mein gnedig
ster herr von Mentz/ Mein gnedigster herr zu Sachsen. &c.
wird mir helffen/ Ja fehlts anders nicht/ das sie morgen
sterben odder dürffen selber hülffe vnd rad/ eben so wol od
der mehr denn du.

2 Denn er ist mein hort/ mein heil/ mein
schutz/ Darumb werde ich wol bleiben.

Ja freilich/

Ja freilich/ weil du das glaubest/ bistu wol sicher/ wenns
auch eitel Türkische/ Tatterische Keiser vnd eitel zornige Kö-
nige vnd Fürsten regnete vnd schneyete/ neun iar lang anein-
ander/ mit alle yhrer macht/ dazu alle Teufel mit yhnen.

Hort hab ich verdenkscht da auff Ebreisch stehet zur/
welchs heist einen fels/ Denn hort heissen wir/ darauff wir
vns verlassen vnd vns sein trösten. So wil er nu sagen/ Ich
weis/ das mir mein heil von yhm kompt/ Warumb? Dar-
umb/ Ich habe keinen menschen/ wie gros / mechtig / reich
er ymmer sey/ mir zum trotz/ hort/ trost vnd heil gesetzt/ noch
mein hertz odder hoffnung auff yhn gestellet/ sondern Gott
hab ich dazu erwelet / von dem alleine mir alles glück vnd
heil komen sol vnd wird/ So heist er nu Gott seinen fels od-
der hort/ darumb das er seines hertzen gewisse vnd sicher zu
versicht auff yhn setzt. Sein heil darumb/ das er glaubt vnd
nicht zweyfelt/ Gott werde yhm helfen mit glück vnd heyl/
ob gleich Saul vnd alle menschen yhn verliesen vnd niches
geben widder dorff noch stad. Seinen schutz darumb/ das
er hoffet vnd gewis ist/ Gott werde yhn verteydingen wid-
der alles vbel/ wenn gleich Saul vnd alle seine hofeschran-
en sein verderben vnd seinen tod suchen.

Welch eine feine seele ist doch das/ die ein solch liedlin
kan Gotte singen/ Aber auch wie selzam ist sie/ so man doch
sonst alle höfe vnd stedte vnd land vol findet/ die den gros-
sen Hanssen auch solche liedlin/ zu weilen vmb zehen gulden
odder noch geringer parteecken singen können.

3 Wie lange stellet yhr dem man nach/ das
yhr alle yhn erwürget / als eine hangende
wand vnd zu stossen zaune?

Den vers wolt ich meisterlich aus streichen wenn ich
mich auch müste zum exempel setzen/ Aber es heyst/ Meine
seele schweige Gott/ David hats erfahren das der herrn heuch-
ler so sind

ler so sind geschickt/ weil des Königes gnade leuchtet/ da
war nichts herlichers denn David/ yderman wolte da freund
sein vnd den David lieben/ vnd yhr hertz dachte doch/ Das
dich der teufel weg fure diese stunde/ das ich an deine stat
kome vnd des Königes Lieblin auch werde/ Aber da der Kö-
nig yhm feind ward/ da brachs er aus/ was sie zuuor gedach-
ten/ Da wolte ein iglicher dem Könige hosiern vnd das beste
an Davids verderben thuen/ da war keiner faul/ Alle/ Alle
wolten sie yhn/ mit der vnd dieser hand erwürgen/ da giengs
ym hofe/ Ach das den buben die pestilentz/ Veytz tanz/ vnd
alle flüche bestehen/ sonderlich wenn es der König odder sei-
ne orenmelcker hören. Das ist/ das er hie sagt/ Wie lange
stellet yhr einem nach? vnd wollet alle dazu thuen/ das er ster-
be? Als solt er sagen/ wie gar hanget yhr an ein menschen
vnd verachtet Gott/ das yhr vmb seinen willen auch zu mor-
den bereit seyt/ vnd tag vnd nacht darnach trachtet? Aber
yhr habts ytz gut zu thuen/ weil ich nu bin als eine geneygte
wand vnd zustossen zaun/ Denn einer wand vnd zaun/ die be-
reyt zur erden hangen/ ist bald geholffen/ das sie vollend gar
nydder fallen. Also auch/ wenn ein furst/ Herr/ Grosser hant
einen man drückt/ so hanget die wand vnd der zaun/ So ko-
men denn die suchenspenninge vnd lassen sich düncken/ das
stündlin sey komen/ yhr mütlin zu külen vnd ritter zu werden/
vnd treten yhn vollend zu fussen/ dem sie billicher solten auff-
helffen vnd den zaun stützen vnd die wand vntersetzen. Das
heist denn dem todten lawen den bard reuffen/ welchen sie
lebendig nicht hetten thurst anrüren. Also/ die David halfften
vnterdrücken/ da Saul yhm feind ward/ mussten wol das
hütlin fur yhm abnemen/ da er bey gnaden war. Aber die welt
thut nicht anders/ da mag man sich nach richten. Christus
musste selbst einen haben (das war Judas der verrheter) der
yhn hülfte vntertreten/ da er schön bereyt von den Jüden ge-
sucht ward zum tode/ wie er sagt Psal. 41. Der mein brod isst
hilfft mich mit füssen treten. Es gehet so vnd mus so ge-
hen/ beyde

hen/ beyde ynn geistlichem vnd weltlichem regiment/ das die
künen helde/ den todten lewen reuffen/ die eins lebendigen
hunds sich nicht erwerben können/ So viel vermag der trost
auff menschen.

4 Aber sie dencken seine höhe zuuerstossen/
lügen gefallen yhn/ Mit dem munde segs
nen sie/ Aber ynwendig fluchen sie. Sela.

Es ist yhn nür darumb zuthun/ das sie yhn crunter sto
ffen/ vnd sie an seine stat komen/ Denn so gehets ynn der welt
kômpt yemand ein wenig auff/ so hat man keine ruge/ bis
er kome auff vnterst/ Solch ein böser geist ist der welt furst
der Teufel/ das er auch niemand kan leiden/ das er leiblich
etwas grosses sey/ schweyge denn das er geistliche güter solte
leiden können.

Lügen gefallen yhn.

Das ist/ sie gehen mit eitel falscheit vmb/ das sie solchs
zu wegen bringen/ gute wort geben sie/ vnd ist nichts dahin
den/ das ist yhr lust vnd gefallen/ Vnd dürffen auch wol mit
dem/ den sie wollen verderben/ auff aller freundlichst reden
vnd berden/ vnd dencken doch/ das dich alle plage bestehe/
hören auch nicht auff/ bis sie yhn helffen verderben/ Das
heyst/ sie loben mit dem munde/ ynwendig aber fluchen sie/
das ist/ ym hertzen wündschen sie yhm alles hertzenleyd/ vnd
sprechen doch/ Mein freundlich dienste zuuor/ was ich thu
en kan findet yhr mich allzeit willig/ Da verlas dich auff vnd
backe nicht/ sihe was du essen wirst. O solche tücke sind als
ler erst köstlich/ wenn sie gehen ynn geistlichen sachen des
Euangelij/ da die falschen brüder vnd Rottengeister/ wol
len Christliche brüder sein/ vnd sind verzweifelte schwermer
vnd buben/ dencken doch nichtes anders denn das sie oben
schweben vnd die ehre haben/ haben doch gleichwol das
maul voll segens/ vnd wie sie Gotts ehre vnd die warheit
suchen. Aber meine

5 Aber meine seele schweige Gott /
Denn meine hoffnung ist zu yhm.

Weil Sauls hofegesinde/ alle welt/ auch die falschen
geister/ allzumal so falsch sind/ Was sol doch ein from hertz
hie thuen? Nichts anders/ denn schweige vnd sey stille/ lasse
sie liegen/ triegen/ böses dencken vnd thuen/ Vnd befelh seine
sache vnd sich selbs Gott/ vnd hoffe auff yhn/ Lasse sie mit
solchen lügen vnd falschen bösen tücken den menschen vnd
Fürsten dienen vnd auff sie hoffen/ Es wird sich wol finden/
welche hoffnung die beste sey.

6 Gott ist mein hort/ mein heyl/ vnd
mein schutz/ Ich wil wol bleiben.

Diesen vers widderholet er noch ein mal/ zu trotz den
falschen leuten/ vnd zu trösten sein vnd vnser aller hertz/ Denn
er damit beschleust sein exempel vnd lere/ darynn er vns geles
ret hat/ was die welt ist vnd wie sie thut/ das wir kecklich sie
sollen verachten. Was nu gesagt ist ym andern vers/ das
mustu hie auch sagen/ denn es ist ein vers.

7 Bey Gott ist mein heyl/ mein ehre / der fels
meiner stercke/ meine zuuersicht ist auff Gott.

Hie fehet er an zu warnen vnd vermanen/ Denn er helt
gegenander Gott vnd menschen/ als solt er sagen/ Wolan
yhr habt mein exempel gehört/ wie es gehet ynn der welt/
vnd sonderlich zu hofe/ da der welt heubt vnd bestes ist/ So
halt sie nu gegenander/ Gott vnd menschen/ so werdet yhrs
finden gewislich/ wie ichs funden habe/ Nemlich/ das bey
Gott ist mein heil/ mein ehre zc. Das ist/ Gott wil vnd kan
helffen/ Er gibt gesundheit/ glück vnd heyl/ darauff man
sich verlassen mag. Er ist auch meine ehre/ das ist/ Er gibt
auch gut/ gewalt vnd würde gnug/ welchs ehrlich ding ist
vnd gehalten wird/ Denn ehre ynn der schrift heist nicht als

Leij keine das

leine das gute gerüchte/sondern die güte/danon das gerüch
te erschallet/ Als Matt. 6. Ich sage euch/ das Salomon ynn
alle seiner ehre nicht ist bekleydet gewest als der eines. Vnd
psalm. 78. Sie wandelten yhre ehre ynn ein kalbs bilde. Das
ist/ yhren Gott vnd Gotts dienst/ Die gottlosen aber suchen
solchs alles bey Fürsten vnd menschen.

Der fels meiner stercke/ Er ist der grund vnd trotz/ dar/
auff meine macht vnd regiment stehet/ Stercke heist hie/ wie
auch fast an allen enden/ die macht odder gewalt zu regirn/
als da ist an Fürstenthum/ Königreich. Auff das ers ia alles
fasse ynn diesem vers/ Mein heyl (Das ist/ alle mein glück
vnd wolffart) Mein Ehre (das ist/ alle mein gut vnd ver/
mögen) Mein stercke/ Das ist/ alle meine macht vnd ober/
keit/ Summa Summarum/ Ist etwas das ich haben kan
auff erden/ Es sey gesundheit/ krafft/ gut/ ehre/ gerücht/
macht/ oberkeit vnd alles miteinander/ das wil ich widder
Keiser/ Könige/ Fürsten noch einigem menschen befehlen
noch vertragen/ noch von yhm gewarten. Bey Gott sol es
stehen vnd fallen/ bleiben vnd faren/ Wens der helt/ so ist
gehalten/ obs gleich alle welt wolt fellen/ wens der fellet/ so
felts/ obs gleich alle welt wolt halten/ Also auch mein zuer/
sicht ist auff Gott/ das ist/ nicht allein alles guts wil ich von
yhm gewarten/ sondern aller widderwertigkeit wil ich trotz
bieten vnter seinem schiirm/ denn ich mich verseehe/ er wird
mich nicht lassen. Menschen verlassen ymerdar vnd ist keine
zuersicht da gewis.

Hoffet auff yhn alle zeit/ yhr völker/
8 Schüttet ewer hertz fur yhm aus/
Gott ist vnser zuersicht. Sela.

Weil Gott nu ein selcher ist gegen mir/ O so folget mir
trewlich nach/ Er wird vns allen so sein/ Ich habs erfahren/
darumb kan ichs euch tröstlich radten/ Last zürnen/ Saul/
Bapst/ Keiser/ König/ Fürsten vnd yderman/ fürcht euch
nicht/ hoffet

nicht/ hoffet auff Gott/ er fehlet nicht. Widderumb/ Laß
Saul/ Bapst/ Keiser/ Könige/ Fürsten vnd yderman lach
en/ trösten/ verheissen/ hoffet nicht auff sie/ verlast euch nicht
drauff/ Sie sind vngewis beyde/ an leib vnd mut/ Leib felt/
mut andert sich bald/ Gott bleibt feste/ Auff das yhr also zu
beyden zeiten/ es sey glück odder vnglück da/ auff Gott euch
verlasset/ fehlet euch aber etwas/ wolan/ da ist gut rad zu/
Schüttet ewer hertz für yhm aus / klagets nür frey/ berget
yhm nichts/ es sey was es wolle/ so werffts mit hauffen eraus
für yhm/ als wenn yhr ewer hertz ein gutten freunde ganz
vnd gar eröffnet/ Er hörts gerne/ wil auch gerne helffen vnd
radten/ Schewet euch nicht vor yhm/ vnd dencket nicht/ es
sey zu gros odder zu viel/ Getrost eraus vnd soltens eitel secke
vol mangels sein / Alles eraus/ Er ist grösser vnd vermag
vnd wil auch mehr thuen/ denn vnser gebrechen sind/ Stüt
ckels yhm nür nicht/ Er ist nicht ein mensch dem man künd
te zu viel bettelns vnd bittens für tragen/ Vhe mehr du bit
test/ yhe lieber er dich höret/ schütte nür reyn vnd alles eraus/
tröpfle vnd zipffle nicht/ Denn er wird auch nicht tröpflet
noch zippeln/ sondern mit sindflut dich vberschütten. Er ist
vnser zuversicht/ vnser zuflucht vnd sonst niemand/ Denn
alle ander sind zu geringe/ das sie vnser hertzen kündten las
sen ausschütten für sich/ Solt ich einen tropffens meins hertz
en eraus lassen für dem Keiser/ so müste er selbs ein bettler
werden/ denn er künd mirs nicht settigen/ was solt ich mich
denn zu yhm versehen odder zu yhm zuflucht haben/ wenn
ich mein hertz gar aus schütten solte/ vnd solt das alle zeit
thuen/ Ey es ist zu mal nichts mit menschen/ wie folget.

9 Aber die menschen sind eytel/ die leute sind falsch/
Auff der wagen weren sie leichter denn eytel.

Was Gott ist/ hastu gehort/ Tu höre dagegen/ was
menschen sind/ Es ist nichts mit yhnen (spricht er) verlestu
dich auff sie/ so wisse/ das du dich auff lauter nichts verles
fest/ Es

℞ iij fest/ Es

fest/ Es wird dir gewislich feylen. Ja spricht er/ Wenn man
solt auff eine wage legen/ ynn eine schüssel/ die menschen/ ynn
die ander/ eytel odder nichts/ so würden die menschen leicht
ter sein denn nichts. Solche Ebreische rede machen wir deut
schen also. Menschen sind weniger denn nichts/ Was sie ey
tel heissen das heissen wir/ nichts. Wie Salomon sagt/ Ec
cle. i. Es ist alles eytel vnd ein lautter eytel/ das ist/ Es ist mit
menschen thand nichts vnd lauter nichts.

Hie fragestu/ Wie ist der mensch nichts/ so er doch
Gotts geschafft vnd Creatur ist: Antwort. David redet nicht
von der creatur an yhr selbs/ sondern vom brauch der crea
tur/ Das ist/ Der mensch ist wol ein gut ding/ Man braucht
sein aber nicht recht. Ein Fürst/ König/ Keiser/ ist auch ein
gut ding/ man braucht yhr aber nicht recht. Wie so? Ey man
wil auff sie trawen vnd bawen/ Inn solchem brauch sind sie
nichts. Warumb? Sie sind vngewis/ beyde yhrs lebens vnd
hertzens. Sand vnd wasser ist auch gut ding/ Aber das ich
drauff wolte ein haus setzen/ da weren sie nichts/ vnd weni
ger denn nichts/ Das ich aber wasser trincke vnd mich was
sche/ da ist nichts/ sondern ein köstlich nützlich ding/
Denn es ist dazu geschaffen/ vnd das ist sein brauch/ Also
auch Fürst/ König/ Keiser/ ist geschaffen/ das sie fride halten
ym lande zc. Da sind sie Gotts creatur vnd ein gut ding.
Aber das ich auff sie trawen wil/ das ist nichts. Er spricht
nicht/ Nolite obedire Principibus. Sed/ Noli confidere in
Principibus. Confidere/ gehört Gott alleine. Ich sol nicht
dreck fur golt verkeuffen/ Dreck hat seinen brauch/ Aber das
er solt golt gleich sein/ das ist nichts. Denn du sibest/ das die
ser psalm redet/ von eytel glauben/ trawen/ zuuersicht/ ver
lassen/ Welche titel alle sind den menschen vnd Fürsten zu
hoch. Wie wol die welt nicht anders thut/ denn auff mensch
en trawen/ Vnd Gott nichts vertrawen/ Das ist/ sie ist
nichts vnd trawet auff nichts.

Wie sind

Wie sind aber die menschen leichter oder weniger denn nichts? Was kan weniger sein denn nichts? Antwort. Was nichts ist/ das betruget niemand/ Aber wer auff das trawet/ das nichts ist/ der hat zweyerley schaden/ Einen/ das er nichts findet/ Den andern/ das er verleuret was er drauff wendet/ Denn wer schlecht nichts hat/ der hat ein einfeltigs nicht/ vnd wendet nichts drauff/ Wer aber auff menschen trawet/ vber das/ das er nichtes findet/ verleuret er auch das/ das er drauff gewand hat/ vnd wird also seine hoffnung vnd kost auch zu nicht vber dem nicht/ darauff er hoffet/ Darumb ist's recht gered/ das ein mensch ist weniger denn nichts/ Denn die welt leset yhr trawen auff die menschen nicht/ So feylets auch nicht/ das sie vmb sonst trawen auff nichts. O ein herlicher preis vnser alle die wir menschen heissen/ das wir weniger sind denn nichts/ So sein kan einer dem andern helfen.

10 Verlast euch nicht auff vnrecht vnd gewalt /
Vnd seyd nicht eytel / fellet euch reichthum
zu / so henges das hertze nicht dran .

Wie beschleust er den psalm mit drewen vnd schreckt die gottlosen mit Gottes gewalt/ vrteyl vnd straffe/ Vnd wil also sagen. Es künzelt euch vnd thut euch so wol/ das yhr zu hofe seyt/ vnd an Saul einen gnedigen herrn habt/ da seyt yhr sicher/ last euch düncken/ yhr sitz feste/ fragt nicht darnach/ ia lachet sein dazu/ das yhr mir vnrecht thut/ schaber nact vnd beschedigt mich vnd meins gleichen/ Wir müssen von euch leiden/ Man thar euch nicht straffen/ Denn ewer herr helt vber euch/ da verlast yhr euch auff/ Aber ich radte euch/ das yhr nicht so thut/ Seyt nicht zu sicher vnd gewis. Seyt nicht eitel/ Das ist/ bawet nicht so auff Fürsten vnd menschen/ welche nichts sind/ denn damit werdet yhr eytel nichts/ Das ist/ yhr gehet mit nichts vmb vnd richtet nichts aus/ wird euch auch alles fehlen.

Ja ich

Ja ich wil weiter sagen/Wenn euch auch mit recht vnd von Gott reichthum zu siele/so verlasst euch doch auch nicht drauff/ vnd macht den Mammon nicht zum Gotte/ Denn gut wird nicht darumb gegeben/das man drauff barwen vnd trozen sol/welchs ist auch nichts vnd cytel/sondern das man sein brauchen vnd geniessen sol/vnd andern mitteylem. zc. Aber menschen lassens nicht/die barwen vnd trozen beyde auff Fürsten vnd gut/das ist allenthalben auff nichts/vnd handeln auff nichts/Denn gut macht mut/Es ist aber nicht gut/vnd erbelt nicht den mut. Das hertz dran hengen ist so viel/ als sichs annemen/ Nicht dran hengen/ ist/ sichs nicht annemen / vnd also haben als hette mans nicht / Denn so lauts ym Ebreischen/Ponere super cor/odder/Ponere in corde/Sichs annemen vnd lassen zu hertzen gehen/ Vm dert henden sol das gut sein/nicht ym hertzen/Wie Paulus sagt zu den Corinthern / das wir der welt sollen brauchen / als braucht man yhr nicht zc.

11 Denn Gott hat ein mal gered/das hab ich wol zweymal gehört/das bey Gott macht ist.

Das sagen wir auff Deudsch also/ Eins weis ich wol/des bin ich gewis/denn Gott hats selbs gered/ der nicht liegen kan/das Gott ein Herr ist/welchs ich mehr denn ein mal gehört habe/ Das ist/ Seyd nicht so cytel vnd gottlos/ Wo aber nicht/sondern wolt auff menschen ia trozen/Wolan so sage ich euch/das bey Gott macht ist/ das er der rechte Keiser/ König / Fürst/ vnd Herr ist / auch vber euch vnd ewer herrn/ gleich wie vber alle/ das last euch gesagt sein/ Denn Gott hats selbs gesagt dazu/ vnd ich habs auch offft gehört vnd erfahren/ wie ers beweiset hat/ vnd die gewaltigen vom stuel gestossen. Sehet zu/ das euch auch nicht so gehe/ mit ewrem herrn/ Last Saul/Saul sein/ Last Keiser/Keiser sein/ Last Fürsten/ Fürsten sein/ Last menschen/menschen sein/ furchtet Gott / denn es ist ein einiges wörtlin / das Gott mechtig sey/

mechtig sey/ Aber es hat ein gros vñd manch geschrey/ man
hats offft erfahren das so sey/ Er wird warlich ewer auch nicht
schonen noch feylen/ ob yhr wol izt yhn veracht vnd eytel
seyd/ vnd vmb menschen willen vns beleydigt vnd vnrecht
thut.

12 Vnd bey dir **HERR** ist guete/ das du bes
zalest ein iglichen wie ers verdienet.

Gleich wie er macht hat/ alle gottlosen gewaltiglich zu
straffen vnd künnen yhm nicht entwerden/ Denn er ist alleine
Herr/ vnd alle hirschaft ist sein vnd von yhm/ Also widder
umb ist er auch gütig vnd barmherzig/ das er den elenden
hilfft/ vnd nicht leiden kan/ das sie solten gar vntergehen /
vnd den heuchlern vnd Sauliten endlich vnterligen vnd
verlassen sein/ Sondern wie geschrieben stehet. Luce. i. Gleich
wie er die gewaltigen vom stuel stößt/ also erhebt er auch die
nyddrigen ihene durch seine macht/ diese durch seine guete/
wie folget/ Das du vergeltest ein iglichen/ wie ers verdienet.
Den gottlosen vergilt er mit gewalt/ gleich wie sie gewalt ha
ben geübt/ Den elenden vergilt er mit guete vnd gnaden /
gleich wie sie gütig vnd gedültig on gewalt sind gewesen.
Aber die welt fragt nichts darnach/ feret ymmer fort mit yh
rem eytel vnd freuel. So lests Gott auch geschehen vnd feret
auch ymmer fort mit seiner macht vnd guete/ auff das des ei
nigen worts/ vnter allen andern Gotts Worten/ nür viel ex
empel werden/ vnd mancherley historien des einigen texts
geschehen/ wie er die grossen Hanssen störzt vnd bricht/ als
ein mechtiger herr/ vnd den elenden/ verlassenen hilfft als ein
gnediger gütiger vater. So thet er mit Saul vnd David/ Als
so thut er izt mit dem Papst vnd dem Euangelio/ mit den
Bischouen vnd den Christen/ Vnd wirds noch ymmer mehr
thun/ bis sie zu grunde gehen/ vnd erfahren/ das war sey das
David hie sagt/ Es sey ein einiges wort Gotts/ das er mech
tig vnd gütig sey/ Aber es werde zu mal viel mal dauon ge
hort vnd offft erfahren/ Wer oren hat zu hören der höre.

S

Der vier

Der vier vnd neuntzigst Psalm

1 **HERR** Gott der rache / Brich
erfur / Gott der rache.



Zeser Psalm wie man
wol greiffen kan / ist ein gemein gebet
aller fromen Gottes kinder vnd geist-
lichen volcks / widder alle yhre verfol-
ger. Also das er mag gebet werden
von anbegyn der welt bis ans ende /
von allen fromen Gottseligen leuten /
sie seyen Jüden odder Christen odder
Patriarchen / denn sie müssen alle diese zwo gemeine verfol-
gung leiden / die ynn diesem Psalm verklagt werden / Als da
sind zum ersten die Tyrannen / die den leib verfolgen vmb
worts willen / mit gewalt. Zum andern die falschen lerer /
Ketzer vnd rotten / die die seelen verfolgen / mit lügen vnd heu-
chley / Darumb mügen wir auch diesen Psalm wol beten zu
vnsern zeiten / widder den Papst / Bischoue / Fürsten vnd
herrn die vns leiblich mit gewalt verfolgen vmb
Euange-
lions willen / Vnd widder die rottengeister / die vns mit fals-
cher verkereter auslegung der schrift geistlich verfolgen /
gleich wie die fromen rechten Jüden den selbigen gebettet
haben widder die Heiden / so vmb sie her wueteten vnd on vn-
terlas verfolgeten / vnd widder die falschen propheten / so
vnter yhn waren / vnd mit verkeretem verstand der schrift
das volck verfürten / So spricht er nu.

Oh Herr / der du ein Gott der rache bist / Das ist / der du
alleine der recher vnd streffer bist aller bosheit / beyde leiblich
er vnd geistlicher bosheit. Vnd er setzt zweymal (Gott der
rache) wie die pflegen zu thun die hefftig vnd mit grossen
ernst reden / die selbigen sagen ein ding viel mal / auff das sie
Gott bewegen /

Gott bewegen/ Doch auch daneben anzuzeigen/ das er zwey
erley verfolger verklagt/ vnd vmb zwo rache odder straffe bit
tet/ beyde vber Tyrannen vnd Ketzer. Es ist aber eine Ebra
ische rede/ das er spricht/ Gott der rache/ das ist/ welcher als
lein sol vnd kan rechen. Solcher weise braucht Sanct Paul
us auch offft/ als Roma. xv. Der Gott der hoffnung/ Item
Gott der gedult vnd des trosts. Vnd. 1. Cor. 1. Gelobt sey
Gott der vater aller barmhertzigkeit/ vnd Gott des trosts/
Das ist/ Gott/ der die hoffnung/ gedult/ trost gibt. Also auch
hie/ Gott der rache/ das ist/ der die rache thut/ denn von sei
nen wercken/ gibt yhm die schrifft namen. Weil aber niemand
solche werck thuen kan/ denn Gott alleine/ furet billich auch
niemand die namen solcher werck denn er alleine/ Niemand
kan trösten/ hoffend machen/ gedültig machen/ vnd so fort
an/ denn Gott alleine/ Also kan auch niemand die sünde
straffen/ vnd das böse rechen denn er alleine/ Denn wie sol
ten menschen alle bosheit rechen können/ so sie nicht mügen
allerley bosheit kennen? Ja das mehr teyl für tugent halten/
das doch böse vnd der rache werd ist/ wie die gleysner yhre
lere vnd werck für gut achten/ vnd vngerochen vnd vnges
strasset wollen haben/ so es doch eytel zweyfeltige bosheit ist/
Darumb wil der name wol alleine Gott eigen bleiben/ Gott
der rache/ wie Gott der gedult vnd Gott der hoffnung.

Brich erfür (spricht er) Denn das wort Zophia/ heist
ia/ sich erfür thun/ eraus brechen wie ein glantz/ vnd sich ses
hen lassen/ vnd an tag komen/ das es yderman sehe/ Wie
Mose spricht Deutero. 33. Der Herr ist von Sinai komē/ Von
Seir ist er auffgangen/ vnd von Paran ist er erfür brochen.
Also wil er hie auch sagen/ Tyrannen vnd falsche Propheten
haben vberhand genomen/ Die haben sich eraus gethan/ vnd
lassen sich sehen/ vnd gehen ym schwanck/ Du aber schweis
gest stille/ verbirgest dich/ als werestu begraben vnd konnest
nicht mehr/ denn du werest vnd straffest nicht solche bos
heit/ darumb

S ij

heit/ darumb

heit/darumb bitten wir/Brich doch auch ein mal erfur/kuck
eraus vnd las dein andlitz blicken widder sie/ Vnd das bil
lich/Denn du bist ein Gott der rache/dir gebürt yhe zu rech
en vnd zu straffen/Rechen dich doch selber/Ist denn Rache
dein werck vnd ist yzt so hoch von nöten/warumb verbir
gest du denn dich ym finstern/vnd leffest dich so gar nicht se
hen?

Hie wil sichs fragen/wie fromme geistliche leute mügen
vmb rache bitten/weil Christus spricht/Matt. 6. Bittet für
ewer verfolger/thut wol denen die euch hassen/liebt ewer
feinde/Summa/es ist widder die liebe zum nehesten/das
man rache vnd straffe wüdsche/so man sol viel mehr guts
thun vnd wüdschen Roma.12. Antwort. Glaube vnd Lie
be sind zweyerley. Glaube leydet nichts/Liebe leydet alles/
Glaube flucht/Liebe segenet. Glaube sucht rache vnd stra
ffe/Liebe sucht schonen vnd vergeben/Darumb wenns dein
glauben vnd Gottes wort antrifft/da gilts nicht mehr lie
ben odder gedültig sein/sondern eitel zürnen/eyfern vnd schel
ten. Es haben auch alle Propheten so gethan/das sie yns
glaubens sachen keine gedult noch gnade beweiset haben/
Doch weil der folgend psalm wol erger ist/vnd nicht alleine
rache bittet/sondern auch flucht/wollen wirs daselbst hyn
sparen/vnd als denn weyter antwort geben.

2 Erhebe dich du richter auff erden/
Vergelte den hoffertigen.

Gleich wie Gott alleine rechter ist/so ist er auch alleine
richter auff erden/Denn alles was die oberkeit richtet vnd
rechet/das geschieht aus seinem befehl vnd ordnung/als
thet ers selber/Was sie aber nicht richten noch rechnen kan/
das thut er/Auff das es alles war sey/das er alleine der rech
er vnd richter sey auff erden/wie auch psalm.8. spricht/ Der
HERR ist richter vber das volck. Weil er denn nu rechter
vnd richter ist/bitten die fromen menschen/das er sich erhe
be/Das

be/ Das ist/ das er sich hoch setze zu stuel als ein richter vnd be
weise sein werck / lasse sich nicht so vnter drücken / als sey er
nichts. Er machts alles zweyfechtig ynn diesem gebet/ Gott
rufft er an als einen reher vnd richter/ als were es nicht gnug
am reher/ Denn es ist yhm ernst/ vnd bittet widder zweyer/
ley feinde wie gesagt ist. Vnd gantz fein bittet er rache vber
die Tyrannen/ vnd gericht vber die falschen lerer/ Denn die
Tyrannen haben keinen schein/ faren mit gewalt/ drum sind
sie der rache werd/ vnd schön verdampt/ Aber die Rotten
schmücken sich vnd haben einen schein/ darumb müssen sie
durch gericht vnd vrteyl verdampt werden.

Die hoffertigen meint er hie nicht alleine die ym hertz
en hochmütig sind/ Sondern die mit verfolgen vnd verführen
(denn er beyde Tyrannen vnd Ketzer damit meint) vber/
hand genommen haben/ vnd obligen/ als hetten sie schön ge/
wunnen vnd die fromen gedempfft/ welchs auch die art ist
des worts Hoffart/ odder hochfart/ das es heisst/ die hochfa/
ren vnd oben schweben/ vnd das Ebreisch wort/ Geym/ auch
so laut/ Wie auch von Gott selbs Mose Exodi. 15. singet/
Der Herr feret hoch her zc. das der synn sey. Ists nicht zeit
zu richten vnd rechten? hastu doch geschwiegen bis beyde
Tyrannen vnd Ketzer obligen/ hochherfaren/ prangen/ als
die gewonnen haben/ vnd vns gantz vnd gar gedempfft/ das
sie alles alleine vnd wir nichts sind. Vnd wenn ich die zwey
wort Tyrannen vnd Ketzer nenne/ wil ich all wege dabey ver/
standen haben/ die zweyerley verfolger/ aller fromen Gottes
kinder/ auff das mir nicht not sey allewege die Heiden vnd
falschen Propheten ym alten Testament/ die Tyrannen vnd
Ketzer ym neuen Testament/ vnd die Fürsten vnd Schwer/
mer zu vnser zeiten zu nennen/ Denn ich wil damit deuten/ al/
lerley verfolger des worts/ so zu allen zeiten sind gewesen/ noch
sind/ vnd sein werden/ welche sind zweyerley/ wie gesagt ist.

3 **HERR** wie lange sollen die gottlosen/ wie
lange sollen die gottlosen sich frewen.

S ij Das ist/

Das ist/ Du lest sie so ferne komen vnd vber hand nemen/
das sie sicher sind/ vnd sich schön bereyt rhümen/ frewen/ sin-
gen vnd iauchzen als gewis das mit vns verloren sey/ Vnd
solchen triumph ledestu so lange weren vnd siehest zu/ Möcht
doch wol ein fromer mensch dencken/ Es were nichts mit
dir vnd mit deinem wort/ Aber Gott thut nicht anders/ er
lest sie so faren/ auff das wir bitten sollen/ Vnd hic siehestu
aber mal/ das er zwey mal/ gottlosen nennet/ die zweyerley ver-
folger zu verklagen. zc.

4 Sie reden frey eraus halstarriglich /
Alle vbelthetter reden.

Diesen vers kan man nicht so Deudsch geben/ wie er ste-
het ym Ebreischen/ Darumb müssen wir yhm helffen. Er
wil also sagen/ Beyde Tyrannen vnd Ketzer sind so gar me-
chtig worden/ das die Tyrannen von yhrem dinge also frey
waschen vnd plaudern/ als sey yhr ding alleine alles/ vnd vn-
ser ding gar nichts/ Desselbigen gleichen die Ketzer/ haben
sich auff's waschen gegeben/ das man nichts höret/ denn
yhre trewme/ Unser lere vnd glauben kan kaum dafur müs-
cken/ Denn so gehets/ wo rotten vnd Ketzerey auff komen/
die reissen ein/ vnd nemen zu/ das man sonst nichts achtet/
noch hören wil/ wie Paulus spricht/ Gott schickt vnter sie
kressftigen yrthum/ Vnd abermal/ Sie stehen der warheit
seer widder/ Item/ Die gottlosen nemen zu ym bösen/ verfu-
ren vnd lassen sich verführen zc. Darumb lauts ym Ebreisch
en also/ Sie scheumen mit reden altes/ Vnd alle vbelthetter
machen sich wassch hafftig/ Gleich wie ein siedend topff mit
blasen scheumt vnd vbergeheth/ Also scheumen sie vnd ge-
hen auch vber mit vielem gewesche/ des yhr hertz vol ist/
denn/ es seude vnd kocht für grosser hitz vnd lust auff yhre
trewme/ vnd können widder schweigen noch andern zuhö-
ren/ Er nennet yhr ding dauon sie reden/ Alt/ das ist/ steiff/
fest vnd starck/ das nicht new ist/ Denn was new ist/ ist noch
nicht so

nicht so gar angenommen/ vnd helt nocht nicht feste/ das kan
man beugen/ lencken odder endern/ Aber was alt ist/ das ist
angenomen vnd helt hart vnd feste/ des ist man gewonet
vnd bleibt gerne dabey. Alte hunde sind nicht gut bendig zu
machen/ So kan niemand alte schelcke from machen. Also
die Ketzer sind steysff vnd starrig auff yhrer lere/ dauon sie
viel plaudern. Also singet auch Hanna. 1. Reg. 2. Last aus ewi-
rem munde bleiben das alte. Vnd psalm. 31. Verstummen
müssen die lippen so widder den gerechten reden/ Das
ist/ steysff vnd halstarriglich. Vnd psalm. 75. Hebt ewer horn
nicht empor/ redet nicht altes.

5 **HERR** sie haben dein volck zuschlagen /
Vnd dein erbe gedemütiget.

Das thuen die Tyrannen/ so mit gewalt Gotts wort ver-
folgen/ tödten vnd plagen die leute drumb/ Ja die Ketzer
helffen vnd raten auch dazu. Das klagt er Gott vnd bit umb
rache/ So thetten die Heiden den Jüden/ die Römer den
Christen/ vnd yzt vns die Bisschoue vnd Fürsten. Wie es
aber ist ihenen gangen/ so wirds diesen auch gehen/ Denn
solch gebet kan Gott nicht verachten/ da er vermanet wird/
das sein volck vnd sein erbe verderbet wird.

6 **Wydwen** vnd frembdling erwürgen sie/
Vnd tödten die wayssen.

So grausam sind die Tyrannen vnd Ketzer vnd so sich
er/ das sie nicht alleine das volck Gotts verfolgen/ sondern
auch der elendesten ym volck nicht schonen/ als wydwen
vnd wayssen/ welchen man doch billich solt fur andern barm-
herzig sein. Es ist ein vnbarmerzig ding/ vmb die verfol-
ger des worts Gottes/ denn der teuffel reyttet sie gar/ mehr
denn alle andere/ Denn der Teuffel ist Gotts wort feind vber
alle ander ding.

Vnd sagen/

7 Vnd sagen / Der HERR sihets nicht /
Vnd der Gott Jacob merckts nicht .

Nicht / das sie gar nichts von Gott halten / Denn vber
Gott hebt sich kein hadder / Sie bekennen alle Gott. Ja die
verfolger meinen Gott sey mit yhn / vnd das sie Gott dienst
dran thun / wenn sie die fromen verfolgen / sondern vber dem
wort vnd werck Gottes hebt sichs / da wollen die verfolger
nicht / das es Gottes wort sey / sondern verdammens / vnd hal
ten die fromen fur buben vnd verfurer / Darumb sagen sie /
Last vns die verfurer würgen / denn yhr Gott ist nichts / sie
liegen was sie sagen / yhr Gott sihet widder höret / Vnd wird
noch kan solchs an vns rechen / ob er gleich wolt / So gar ge
wis / steysff / vnd sicher faren sie daher ynn yhrem synn vnd vn
glauben.

8 Merck doch yhr narren vnter dem volck /
Vnd yhr thoren wenn wolt yhr Flug werden ?

Es verdreuffte den Propheten vnd billich alle Christen /
das man den nicht wil fur Gott halten / des wort sie rhü
men / drum schilt er sich mit yhn vmb Gottes willen / seine
ehre zuuerteydingen / heyst sie narren vnd thoren ym volck /
da sie doch eytel weisheit furgeben vnd fur treffliche lerer ge
halten werden. Aber er spricht / sie sind narren vnd nerren
das volck mit sich.

9 Der das ore gepflantz hat / solt der
nicht hören ? der das auge gemacht
hat / solt der nicht sehen ?

Das ist / Unser Gott / des wort wir haben / des werck
wir predigen / ist der rechte Gott / schepffer aller dinge / Vnd
yhr lestert yhn vnd sprecht / Er sehe vnd mercke nichts / Ewer
Gott ist viel mehr eitel vnd nichts / wie ewer gedanken sind /
als hernach folget / So er denn der rechte Gott ist / wie solt er
andern das hören vnd sehen geben was yhn gut vnd nütze
ist / vnd

ist/ vnd solt selber nicht sehen noch hören/ was yhn angehet/ was widder yhn odder fur yhn gethan wird/ So müste er et was geben/ das er selbs nicht hette/ Tu er aber oren vnd augen gibt/ müst yhr furwar blinde tolle narren sein/ die yhn nicht kennen/ das yhr sagt/ er sehe vnd höre nicht.

10 Der die Heyden züchtiget solt der nicht straffen/ der die menschen leret/ was sie wissen.

Das die Heyden vnd alle welt/ straffen das böse vnd züchtigen die bösen kinder vnd buben/ das haben sie von vnserm Gott/ der gibts yhn/ das sie es wissen vnd thuen/ Solt er denn selber nicht straffen vnd auch züchtigen können/ die widder yhn böses thuen? Kund yhr straffen was böse fur euch ist/ solt er denn nicht straffen was böse fur yhm ist/ so yhrs doch von yhm habt? Kund yhr sehen vnd hören/ was böse odder gut bey euch ist ob yhr wol narren seyt für yhm/ solt er denn nicht sehen vnd hören/ was böse odder gut fur yhm ist/ so er euch gibt beyde sehen vnd hören/ gleich wie Christus spricht/ Kund yhr guts geben ewrn kindern wie wol yhr arg seydt/ solt denn nicht ewr vater vom hymel guts geben denen die yhn bitten? Denn Gott gibt euch solchs/ vnd alles ander zu wissen/ was yhr wisset/ Aber solch schelten hilfft nicht/ Sie bleiben auff yhrem alten vnd halstarrigen kopffe/ ynn yhrer eytelkeit/ Darumb folget.

11 Der **HERR** weis die gedancken der menschen das sie nichts sind.

Als solt er sagen/ Es ist vmbsonst/ sie bekeren sich nicht/ faren fort/ vnd meinen/ yhr ding beyde das sie wider vns vnd fur sich fur haben/ solle so hynaus gehen/ Aber das ist das beste vnd vnser trost/ das sie feylen werden/ Denn Gott lachet vnd spottet yhr mit yhren klugen gedancken vnd trefflichen anschlegen/ denn er weis/ das sie eytel sind/ Das ist/ sie sind nichts vnd wird auch nichts draus/ wer es nür erharren künd
G de/ Denn

de/Denn es ist umb eine kleine zeit zuthun/ so wird yhr ding
fur yderman zu nicht werden/wie es an yhm selber nichts ist/
Wie auch der.33.Psalm spricht/Der **HERR** macht der hei
den rad zu nicht/vnd lesst feylen der vöcker gedancken/Aber
des **HERR** rad bestehet ewiglich/seines hertzen gedancken
ymerdar. Vnd der ander psalm zeuget auch/das heyden
vmbsonst toben/vnd Könige vergeblich sich aufflehnen/
vnd die Fürsten vnnütz rad schlahen/widder den **HERRN**
vnd seinen Christ. Denn er lacht vnd spottet yhr doch/ als/
die es nicht mügen hynaus füren/Vnd psalm. 21. Sie wol
ten dir vbels thuen/vnd erdachten anschlege/die sie nicht
kündten ausfüren. Sanct. Paulus. 1. Cor. 3. furt diesen spruch
also/ Der **HERR** weis die gedancken der weisen/das sie ey
tel sind. Denn die klugen vnter den leuten gehen am meisten
mit anschlegen vmb/vnd wollen viel aus richten/yderman
radten vnd die welt zurichten/Aber es feylet alles.

12 Wol dem **HERR** / den du züchtigest/
Vnd lereest durch dein gesetzze .

Dancken sol man Gott (spricht er) vnd ist eine grosse
gnade/wer solchs weis/das der gottlosen anschlege vnd
thun eytel ist vnd nicht bestehet/wie wol sie der sachen ge
wis sind/vnd liegen oben so gewaltig/das sie dauon rhümen
singen/sagen/wasschen vnd plaudern/Aber der fromen
sache mus nichts sein/ia man tödtet sie vnd verfolget sie/wie
droben gesagt ist. Sie kan nu vernunfft vnd natur nichts/
vnd weis nicht/das solchs wesen nichts sey/denn sie richtet
wie sie fület/vnd denckt nicht weiter/Sie kan das nicht se
hen/das zukünfftig vnd noch nicht da ist/Sie hanget an
gegenwertigen/darumb spricht er/Gott müsse hie zuchtmei
ster sein/vnd solchs leren/Vnd wol denen/die ers lereet. Wo
leret ers aber? Richtet er ein iglichen ein besonders an? Mit
nichten/sondern durch sein gesezze lereet ers/das ist ynn der
heiligen schrifft lereet ers vns/Da finden wir die sprüche vnd
exempel/

exempel/die vns solchs sagen/wie der Gottlosen anschleget
vnd thun keinen bestand hat/vnd alle wege gefeylet haben/
Denn sihe/wie es Pharao/Sihon/Og vnd allen Königen
der Heyden gieng/vnd durch die ganze Bibel/so findestu/
das yhn allezeit yhr gedancken gefeylet haben. Eben so sprich
cht auch der. 73. Psalm von der gottlosen glück/ Ich dacht
yhm nach/das ichs verneme/Aber es war mühe fur mir (Das
ist/nach der vernunfft kund ichs nicht vernemen) bis ich
hyn ein gieng ynn das heiligthum Gottes/vnd merckt auff
yhr ende/ Das ist/ynn der heiligen schrift fand ichs/da leret
ich sehen/nicht auff das gegenwertige/sondern auff yhr en
de/vnd wie es hernach hynaus gehen würde mit yhn/Da sa
he ich/das nichts mit yhn were/wie gros es auch scheinete.

Damit ist geantwort auff der schwachen frage/wenn
sie sagen/du sprichst/es sey nichts mit der gottlosen thun
vnd anschlegen/ Ich sehe aber wol/das sie grosse ding thun?
Antwort. Sie müssen ia etwas anfahen/Aber da sihe auff/
wie sie es enden/denn yhr anschleget gehen nicht auff's anfa
hen/sondern auff's ausfuren. Der grosse Alexander fieng viel
vnd grosse ding an/das achtet er selbst nichts/Aber sein an
schlag vnd ende war viel grösser/nemlich die ganze welt zu
gewinnen/ Ich meine aber/es feylete yhm. Die Römer hats
tens auch ym synn/ein ewiges reich zu machen/wie Virgili
us spricht/ Imperium sine fine/ Ich meine es feylete auch.
Der Türcke hat yzt auch viel gethan/Vnd hats noch viel
grösser ym synn/Aber der selbige synn mus yhm auch feylen.
Wie hats diese zeit her so grewlich gefeylet/dem Papst/gro
ssen Königen vnd Fürsten/vnd feylet noch teglich? Noch
fürchten sie Gott nicht/vnd lassen von yhren gottlosen an
schlegen nicht abe/Gleuben vnd bitten Gott nicht vmb gna
de/Befelhen auch yhm die sache nicht/darumb sihet man
eytel feylen vnd fallen bey yhn.

Doch wir reden hie eygentlich von dem fürnemen der
G ij gottlosen/

gottlosen/das sie haben widder Gots wort vnd die fromen/
Denn wenn ein gottloser widder den andern sicht/ da gehe
es wie Gott wil/ da gehört dieser trost nicht hyn/ Denn die
schriffte nicht die gottlosen tröstet/ gibt yhm auch keine ver-
heissung/wie wol auch daselbst allzeit die sichere vermessene
anschlege feylen. Also ist das der schriffte trost/ das sie vns le-
ret/ Nicht zu sehen/ wie es die gottlosen anfahen/ sondern
warten vnd zusehen/ wie sie es hynaus furen/ das sie ym synn
haben / Sie habens aber ym synn/ Gotts volck vnd wort
schlecht zuuertilgen/das gehet denn den Krebs gang/ das sie
selbst drüber zu scheytern gehen/ vnd Gott mit den seinen
bleibet/ob wol zum anfang etliche getöd vnd verfolget wer-
den. Also zeuget auch S. Paulus von der schriffte/Roma. 15.
Was geschrieben ist/das ist vns zur lere geschrieben/das wir
durch gedult vnd trost der schriffte hoffnung haben/wie der
folgend vers auch sagt.

13 Das er stille sey zur bösen zeit/Bis dem
gottlosen die grube bereydet werde.

Stille/Das ist/gedültig vnd nicht tobe noch zürne wid-
der die verfolger / welche yhm böse zeit machen. Böse zeit
heist er die zeit/da die Tyrannen vnd Ketzer toben (das ist)
yhr ding anfahen/Denn die Tyrannen verfolgen leib vnd
gut/die Ketzer verfolgen seel vnd geist/Wie kan denn da gu-
te zeit sein/da leib vnd seele teglich ym ferlickheit stehen? Also
redet auch S. Paulus/Denn die zeit ist böse/ Vnd stymmet
zu mal fein mit diesem psalm / auch ym nehesten vers/ der
vns leret durch die heilige schriffte vns trösten vnd gedültig
sein/ ym allerley verfolgung. Das ist aber kurzumb die art
des Euangelij/odder Gotts worts/Wens angehet/ so fehet
an böse zeit/Ursache/der teufel kans nicht leiden/darumb fe-
ret er zu/vnd erregt Tyrannen vnd Ketzer/ das nymer weni-
ger friede/nymer böser leute sind vnd mehr ergernis / denn
zur zeit der gnaden vnd friedes / Das ist / wenn man von
Gotts gnaden

Das ist ein
gottlich

Gottes gnaden vnd friden predigt/welchs durchs Euange-
lion geschicht/ Da wundert man sich denn/ das die leute so
böse sind mehr denn zuuor/ Aber es mus so sein/ Denn hie hö-
restu/ das er klagt vber böse zeit/ vnd leret still vnd gedültig
sein/welchs man zur guten zeit nicht bedarff.

Solch stille vnd gedültig sein/ sol nicht ewig sein/ Denn
es ist schön das ende da/ denn die gottlosen werdens nicht
ausfuren/ wie gesagt ist/ Yhr grube vnd verderben ist furhan-
den. Vnd wie S. Petrus diesem vers zustymmet vnd spricht/
Sie furen vber sich selbst ein schnel verdammis/ Denn ym
Ebreischen mag dieser text auch also lauten/ bis dem gottlo-
sen das verderben gegraben werde/ Verderben vnd gruben
fast auff eins stymmet/ Tu solchs alles mus Gott leren zur
bösen zeit/ das man glaube/ der gottlose solle vntergehen/
Vernunfft dünckt nicht anders/ denn die fromen sollen ver-
derben/ vnd die gottlosen ewiglich bleiben/ so gar wüßte lesse
sichs an.

14 Denn der **HERR** wird sein volck nicht
verstossen/ Noch sein erbe verlassen.

Hie hörestu/ das dieser psalm eygentlich redet von an-
schlegen der gottlosen/ widder Gottes volck/ Denn Gott kan
die seinen nicht lassen/ das ist gewis/ wie er hie sagt/ Dar-
umb ist vnmöglich/ das die gottlosen yhr furnemen solten
hynaus furen/ Es mus yhn sehlen/ es sey denn Gott nicht
Gott/ alleine das vmb eine kleine böse zeit zu thun ist/ darynn
man stille vnd gedültig sey/ das die gottlosen yhr ding anfas-
hen/ vnd darnach zu schanden werden/ Wie auch der. 91.
psalm sagt. Du wirst mit deinen augen sehen vnd schawen/
wie den gottlosen vergolten wird/ Sihestu es hie nicht/ vnd
ynn des getödtet wirst/ so wirstu widder lebendig werden
vnd ynn ihenem leben sehen/ Die lebendigen werdens aber
auch ynn diesem leben sehen. Tu dieser vers ist ein mechtiger
trost vnd trotz fur die fromen/ vnd ein schrecklich vrteyl wid-

G iij der die

der die Tyrannen vnd Ketzer / wer es gleybt / Denn es wird
gewislich so gehen / vnd wenn tausent vnd aber tausent Bep
ste / Keiser / Fürsten / Gelerten / Ketzer auffeinander sessen /
gleich auch wie der folgend vers sagt.

15 Denn das gericht wird widder zurecht
komen / Vnd dem werden folgen alle
auffrichtigen von hertzen .

So viel ich Ebreisch kan / dünckt michs also lauten ym
Ebreischen / Denn gerechtikeit wird noch das recht widder
bringen / das ist / wie wol zur bösen zeit gewalt fur recht ge
het / vnd heucheleiy fur warheit / Aber zu letzt wird doch vn
recht vnd schein nicht bestehen / sondern gerechtikeit wird
komen vnd offenbar werden / vnd das vnrecht zu schanden
machen vnd das recht preisen / Vnd wie wol dem selbigem
nicht alle welt zufallen wird / So werdens doch thun die fro
men / vnd was redlich vnd auffrichtig ist / auff das also das
recht doch bleibe / vnd vnrecht vntergehe. Sihe Johannes
Zus exempel an / der ist zur bösen zeit / mit gewalt vnd vn
recht verdampt / Vzt ist gerechtikeit offenbar worden / vnd
preiset sein recht / da widder nichts hat mügen helffen / alles
was bis her das ganze Bapstum / mit so viel bannen / predi
gen / brennen / toben hat versucht / yhr anschlege sind doch zu
nicht worden / Also giengs den Jüden mit Christo / den Rö
mern mit den Christen. &c.

16 Wer stehet bey mir gegen den boshafftigen ?
Wer trit zu mir gegen den vbelthettern ?

Zie hebt er an Gott zu dancken fur solchen trost vnd ver
stand / wil also sagen / Vm dem toben der gottlosen / war
sonst niemand der mir bey stünde / ich war einig vnd verlas
sen / yderman meinet es were mit mir aus / die gottlosen het
ten gewonnen / Wie auch ein ander psalm spricht / **HERR**
erbarme dich mein / denn ich bin einig / das ist / niemand trö
stet mich /

stet mich/yberman verzagt an mir/on Gott alleine/der mein
meister vnd leiter ist/wie folget.

17 Wo der **HERR** nicht mein helffer were/
so müste meine seele ynn der stille bleiben.

Es were mit mir verloren/die gottlosen füreten yhr für
nemen sein vnd vol hynaus widder mich/wens bey mir stün
de/vnd an den leuten lege/Denn sie legen mir alle ab/so zap
pelt mein hertz selber/Aber Gott ist der mir gedult gibt/mich
anders leret/vnd die gottlosen stortzet vber vnd widder alle
vernunfft/Er lests aber so grewlich angehen durch die gott
losen/auff das er mich lere/das ich verloren were/on seine
hulffe/vnd ich erkenne/das meine krafft nichts sey. Also ist
dieser vers mit den zween folgenden/nichts denn eine danck
sagung für die gnade/das vns Gott tröstet zur bösen zeit/
wenn die Tyrannen vnd Ketzler toben/wie wir gehört haben.

Inn der stille bleiben/welchs Duma heist auff Ebre
isch/ist ein ander stille denn droben gesagt ist. Nemlich/
wenn ein ding gar nichts mehr ist/das man nicht mehr sihet
noch höret noch fület/wie die todten sind/die gar aus den an
gen vnd synnen komen sind/Darumb es bey den Ebreischen
für die helle/das ist/für den ort/da die todten sind(es sey
was es wolle) genommen wird/So wil er hie sagen/Mein see
le/das ist/mein leben were gar zu nicht worden/wie ein tod
vnd vergraben mensch/Denn so war yhm zu synn zur bösen
zeit.

18 Da ich gedacht/mein fus ist gefallen/So
labet mich **HERR** deine guete.

Das ist auch ein stück des dancks/darynne er zeyget/was
er für gedanken hatte zur bösen zeit/So dacht ich (spricht
er) mein fus fellet/Das ist/ich sieng an zu verzweyffeln/vnd
meinet nicht anders/ich müste vntergehen vnd die gottlosen
ewiglich bestehen/Denn ein igliche rechte anfechtung sol als
so gethan

so gethan sein/ das sie den menschen yns verzweyffeln bringe/
vnd scheine nicht anders/ denn das die widderfacher gewon
nen vnd er verloren habe/ So kömpt denn die güte Gottes
vnd labet yhn/ das ist/ er tröst yhn durch die heilige schrift/
wie droben gesagt ist/ das die gottlosen nicht sollen hynaus
füren/ vnd die seinen nicht verlassen werden.

19 Da ich viel bekümmerns hatte ynwendig/
ergetzten deine tröstunge meine seele.

Der vers ist fast einer meinung mit dem vorigen/ Denn
der vorige meldet die gedancken der verzweyfflung/ so er hat
te zur bösen zeit/ vnd wie er da labfal hat von Gottes gnaden
ynn der schrift empfangen. Dieser vers aber redet von den
mancherley gedancken/ die einer hat ynn solcher verzweyff
lung/ wie er wolle odder möchte dauon komen/ Da denckt
er hieher vnd daher/ vnd sucht alle winckel vnd löcher/ fin
det aber keine. So spricht er nu/ da ich ynn solcher marter
war/ vnd mich mit meinen gedancken schlug/ suchte hie vnd
da trost/ vnd fand doch nichts/ Da kamest du mit deinem
trost/ vnd ergetzest mich vnd hieltest dich freundlich zu mei
ner seele mit sprüchen vnd exempeln der heiligen schrift/ das
ich wol mag sagen/ Selig ist der/ den du züchtigest vnd le
rest durch dein geseze.

20 Hat auch der vn selige stuel mit dir gemein
schafft? Welcher arbeit ertichtet mit geboten.

pfu mal an/ was machen doch vnser lerer vnd predi
ger/ das sie solchs nicht auch leren/ wie man die seelen sol mit
der schrift trösten? wie gar gleichen odder reymen sie sich
nicht zu dir/ vnd yhr stuel hat keine gemeinschafft mit dir/
Du lereest gar viel anders denn sie/ Auff dem stuel sitzen sie/
Sie sind lerer/ die schlüssel zum erkentnis haben sie/ Aber was
lernen sie? Jamer vnd hertzleid lernen sie/ Denn das wörtlin
hawoth heist vnglück vnd hertzenleyd/ wie wir auff deutsch
von einem

von einem buben sagen/du wirst ein vnglück anrichten/Das
ist/du wirst ein vntugent begehen/da dir hertenleid vnd als
les vbel begegnet wird/Das also vnglück hie alles beydes be-
greiffe/beyde die missethat vnd die straffe/ So nennet er hie
den stuel Harwoth/die leidigen prediger/die den leuten alles
hertenleid anlegen/ damit das sie vnrecht leren vnd leben/
da durch sie denn ynn Gottes straffe fallen/ Binden/ Knüp-
ffen vnd yrr machen die gewissen können sie wol/ Aber trö-
sten vnd laben können sie nicht.

Also auch/erbeit tichten sie mit gepoten/das ist/ sie tich-
ten viel gesetz/ gebieten dis vnd das/ vnd machen den leuten
viel arbeit/wie Christus spricht Matth. 23. Sie binden vntreg-
liche büden vnd legen sie den leuten auff den hals/Vnd das
alles/das man Gott solle damit bewegen/solche plagen vnd
verfolgung abzuwenden/Vnd wollen schlecht mit wercken
dem vbel weren/ da sie doch solten gedult leren vnd auff
Gottes gnaden vnd barmhertzigkeit trawen. Gleich wie zu vn-
sern zeiten/wenn ein vnfall furhanden ist/ so predigt man/
das man Procession gehen/ fasten/ dis vnd das thun solle.
Summa/ erbeyt macht man/ nicht allein den leuten mit
schrecklichen geboten/sondern auch den glocken vnd kertzern
vnd weyrauch vnd des gleichen/Aber ynn des leret niemand
gedult noch Gottes güte/ So haben der Jüden lerer auch ge-
than/wie er hie klagt/Denn das wort Hok/ das hie stehet/
heist eygentlich die gepot so man teglich ordenet vnd setzet/
welche man Ceremonias odder eusserliche geberde nennet/
Vnd spricht/ das der leydige stuel ertichte vnd erfinde sie/
das ist/Gott hats yhn nicht befolhen/sondern sie spinnen es
aus yhrem eygen kopffe.

21 Sie rüsten sich widder die seelen des gerechten/
Vnd verdammnen vnschuldig blut.

Das können sie auch wol/das/da sie trost vnd Gottes
gnade leren solten/ da stehen sie so feste vnd halten so steiff
vber yhren

uber yhren ertichten gepoten/ das wo man es nicht halten
wil odder da widder redt (wie denn die gerechten thun) da
ist keine gnade noch gedult/ Sie rüsten sich widder sie/ alle
waffen/ gewalt vnd krafft erregen sie widder sie/ vnd mus
dis der aller gröste streyt/ die aller gröste rüstunge sein/ das
nicht gnug ist am schwerd/ Sondern/ wasser/ feur/ erden/
lufft/ vnd alles mus widder solche gerechte fechten. Vnd ver
dammen also vnschuldig blut/ da sie doch meinen/ sie thun
Gott einen dienst dran/ So gar nichts reymet sich yhr stuel
mit Gotts geseze vnd lere. Das sind die Ketzer vnd falsche
lerer/ danon wir droben gesagt haben/ Aber wie die Tyrann
nen yhren loben empfahe/ also werden diese yhrem vrteyl
auch nicht entfliehen/ wie folgen wird.

22 Aber der **HERR** ist mein schutz/ Mein
Gott ist ein hort meiner zuuersicht.

Sie leren/ toben/ würgen/ wie sie wollen/ Ich bin doch
wol sicher fur yhn / vnd gewaltiglich verteydingt / Denn
Gott ist mein schutz. Vnser ler mus bleiben/ yhr tichten mus
vntergehen/ denn Got ist vnser schutz/ So werden wir auch
fur yhn wol bleiben/ es sey hie odder dort/ Denn vnser Gott
ist vnser hort/ darauff wir trozen vnd sicher sind / Nicht
aber alleine das/ sondern er wird sie auch/ dazu/ als ein Gott
der rache/ vertilgen/ wie folget.

23 Vnd er wird yhn yhr vnrecht vergelten/ vnd
wird sie ynn yhrer bosheit verstören / Der
HERR vnser Gott wird sie verstören.

Da stehet das endlich gewis vrteyl/ das Gott yhre bos
heit wird nicht vngerochen lassen/ sondern sie alle verstören
ynn yhrer bosheit/ das yhre bosheit mus auffhören / Vnd
das wird thun vnser Gott/ Das ist/ des wort wir furen/ wel
chen sie fur keinen Gott achten/ vnd meinen Gott sey auff
yhrer seyten/ wie wir droben gehort haben. Wer nu solchs
glaubt vnd von Gott gelert ist/ der kan gedültig sein/ die got
losen toben lassen/ vnd auffß ende schawen/ vnd der zeit er
harren.
Der hundert

Der Hundert vnd neunde Psalm.

Der Titel.

Ein Psalm Davids hoch zu singen.



As das hoch singen

sey / ist droben gesagt / Den psalm
aber hat David ym geist gemacht /
von Christo / welcher redet den ganz
en psalmen ynn seiner eygen person
widder Juda den verrether vnd wid
der das ganze Judenthum / vnd ver
kündigt / wie es den selbigen gehen
werde. Also füret auch S. Petrus die

sen psalm Act. 1. von Juda / da sie an seine stat Mathias we
len / Nicht das er alleine von Juda rede / sondern wie Sanct.
Petrus daselbst spricht / Juda sey das heubt odder furnemest
gewest / das Christus gefangen vnd gemartert ward / Auch
Christus selbst fur Pilato bekennet / das Juda die grössste
sunde gethan habe / das er yhn vberantwort habe. Darumb
geheth der psalm furnemlich widder Juda / Aber doch auch
widder alle die mit Juda sind vnd ynn seinem wercke bleiben
vnd folgen / wie hie ym psalm Christus selbst deutet vnd
spricht / So müsse es gehen allen die mir widder sind / Das al
so dieser psalm von Juda anhebe vnd gehe vber alle die Ju
das art an sich haben / als da sind alle verfolger vnd Kotten
widder Christus wort / Denn die selbigen lestern allzumal die
warheit vnd verfolgen die rechten Christen / Widder die sel
bigen ist dis ein schrecklicher psalm / Denn er flucht vnd ver
kündigt so viel vbel den feinden Christi / das etliche diesen
psalm haben yns gerücht bracht / das die Mönch vnd Non
nen yhn sollen beten widder yhre feinde / Vnd wo er widder
yemand ges

h ij

yemand ges

Yemand gebettet würde / so müste der selbige sterben / Das
sind aber lügentydinge vnd mehrlin.

Warumb flucht denn Christus so vbel / der doch ver-
beut vnd leret Matth. 6. man solle nicht fluchen: Vnd er
auch selbst am Creutze nicht fluchet / wie S. Peter spricht /
Sondern bittet für seine flucher vnd lesterer / wie ich droben
auch von der rache fragte: Ist kürzlich die antwort. Liebe
flucht nicht / rechet sich auch nicht / Aber der glaube flucht
vnd rechet. Das zuuerstehen / müste von einander scheyden /
Gott vnd menschen / Personen vnd sachen / Was Gott vnd
die sache angehet / da ist keine gedult noch segen / sondern ey-
tel eyfer / zorn / rache vnd fluchen / Als da die gottlosen das
Euangelion verfolgen / das trifft Gott vnd seine sache an /
Da ist nicht zusegenen / noch glück dazu zu wündschen / sonst
müste niemand auch widder Ketzerey predigen noch schrei-
ben / syntemal solchs nicht mag zu gehen / on fluchen / Denn
wer da widder sie predigt / der wündscht ia das sie vntergehe
vnd thut das ergest vnd beste dazu / das sie vntergehe. Das
heisse ich nu glaubens flüche / Denn ehe der glaube liesse Gots
wort vntergehen / vnd Ketzerey stehen / er wündscht ehe das
alle creaturn vergiengen / Denn durch Ketzerey verleuret man
Gott selber. Also ist das fluchen Christi ynn diesem psalm
nicht vmb seiner person willen / sondern vmb seines ampts
vnd worts willen / das der Jüden yrthum wil sich bestetigen
vnd das Euangelion vntertretten / Da wündscht er / das sie
vntergehen sollen / vnd kein glück mit yhrem Judenthum ha-
ben / gleich wie Mose Numeri. 16. bittet / das Gott Corah ge-
bet nicht solt hören / noch yhr opffer annemen / Darumb mus
es geflucht / vbel gewündscht vnd rache gebeten sein / wid-
der des Euangelion verfolgung vnd yrthum vnd widder
die so solch vnglück treiben vnd anrichten.

Aber die person sol sich nicht rechen / sondern alles lei-
den / dazu auch dem feinde guts thun / nach der lere Christi
vnd der

vñs der liebe art/ Denn hie regirt die liebe vñd nicht glaube/
vñd gehet mich/ vñd nicht den glauben an/ Als ym gleichen/
Ein Christ mag richter sein vñd den mörder verurteylen vñd
töden/ doch nicht vmb seinen willen noch das seine drynne
zusuchen/ sondern vmb der andern willen vñd von ampts
wegen/ Solchs ist denn gleich so viel als hers Gott selbs ges
than/ Denn seine ordnung thuts. Summa/ fluchen vmb
Gotts wort willen ist billich/ Aber vmb deinen willen/ odder
dich selbs zu rechen/ odder das deine zu suchen/ ist vnrecht.
Vñd ynn solchem fluch ist's fein/ das man Gott's namen nen
ne/ vñd dur. h. Gott fluche/ gleich wie man auch bey seinem
namen schweret vñd segenet. Also stehet geschrieben. 4. Reg.
Das Elisa fluchet den kindern Bethel ym namen des HERR
XVI/ das sie die bern zurissen. Vñd Sacharie. 5. flucht der
Engel also/ Der HERR straffe dich Satan/ Vñd Paulus
Acto. 23. Der Herr schlahe dich / du getünchte wand. 2ce.
Spricht er nu also.

1 Gott meines lobes / Schweyge nicht.

Almermeist klagt er ynn diesem psalm vber die meuler
der gottlosen/ welche allezeit die lere Gottes angreyssen
vñd verdammen/ damit sie vrsache gewynnen auch zu töd
ten die selbigen lerer/ als thetten sie recht/ Vñd ist der hadder
gantz vñd gar vmb der lere willen/ Darumb ich auch gesagt
habe/ das ynn diesem psalm der glaube vñd die sache fluche
vñd nicht die liebe odder person/ Das wil auch das er sagt/
Gott meines lobes/ Als solt er sagen/ Du sibest/ das sie allzu
mal mich vmb deins worts willen schenden lestern vñd ver
dammen/ Ich aber habe niemand der mich lobe/ denn du
mit den deinen/ Darumb schweyge nicht/ Das ist/ lobe/ preise
verklere/ verteydinge mich/ vñd beweise/ das ich recht lere/
Gleich wie Christus spricht zum vater/ Verklere mich/ auff
das dich dein son verklere/ Gib geist/ thu wunder vñ zeichen/
Damit meine lere bestettigt werde/ So verklere ich denn vñd
H III predige

predige dich/ das du rechter Gott vnd mein vater seyest/ so
glaubt man denn mir/ vnd werden beyde verfleret.

Gott meus lobes / Wie wol es ym Latinischen vnd
Deutschen laut/ als das ich Gott lobte/ so ist doch ym Hebrei-
schen so viel gesagt/ als Gott lobet mich/ odder ich habe nie-
mand der mich lobet denn Gott/ gleich wie das Psalm. 89.
Gott meus heils/ nicht heist/ das ich Gott helffe/ sondern
das er mir helffe/ Vnd Gott meiner gerechtikeit/ Psalm. 5.
heist nicht/ das ich Gott gerecht mache/ odder zum recht hel-
ffe/ sondern er hilfft mir/ das ich recht bin vnd recht behalte/
Also hie auch/ Gott meines lobes/ das ist/ Gott helt vber mei-
nem lobe/ Er verfleret vnd ehret mich/ weil ich vmb seiner
willen mus vertunckelt/ gelestert vnd geschendet werden.

- 2 Denn die falschen meuler der gottlosen
haben sich widder mich auffgethan/ Vnd
reden widder mich mit lügen zungen.

Das ist/ wie gesagt ist/ Sie beliegen vnd lestern mich
schendlich vnd felschlich/ das meine lere/ dein wort mus yr-
thum/ Ketzerisch/ auffrührisch vnd verdampft sein / Darumb
schweige du nicht/ vnd lobe mich widder yhr schelten vnd
schenden/ So mus gehen allen Euangelij predigern.

- 3 Sie bereden mich mit heffigen worten allenthal-
ben/ Vnd streitten widder mich on vrsache.

Das ist/ yhr giffte reist weit ein vnd frist vmb sich wie der
Krebs/ als Paulus spricht/ das sie viel verführen/ vnd machen
mich mit solchen heffigen worten/ feindselig vnd vnwerd für
yderman/ fechten also widder mich on alle vrsache/ denn ich
lere die warheit / derhalben sie mir billicher solten zusallen
vnd beystehen/ so fechten sie widder mich.

- 4 Da für das ich sie liebe/ sind sie
mir widder / Ich aber bete.

On vrsache

On vrsache (sage ich) Denn ich beweise yhn viel liebe
damit/das ich die warheit yhn sage/ Aber fur die liebe mus
ich has vnd heffige wort vnd nachreden empfangen. Was sol
ich aber thun ynn solchem fall? Ich bete. So leret auch S.
Paulus die Epheser/ Ynn allen dingen last ewer gebet mit
bitten vnd danck/sagung kund werden fur Gott/ Als solt er
sagen/ Was sol man doch thun? Sie kunnen wolthat nicht
leiden/ Wolan so mus mans Gott befehlen vnd sich zum ges
bet halten. Ach wie ein from kindlin ist die welt/ Obels wil
sie nicht haben/ guts kan sie nicht leiden. Kat/ was wil sie
denn haben? Zelligsch fewr vnd den teufel dazu/ da ringet sie
nach/ das wird yhr auch begegnet.

5 Sie thun mir böses vmb guts/
Vnd has vmb liebe.

Lieber/ sihe wie nahe redet er vnserm Herr Gott vnd wie
gewaltig er betet. Sie haben doch keine vrsache (spricht er)
das sie widder mich streiten/ lere ich doch die warheit/ das
weystu/ So haben sie viel weniger vrsache/ das sie mir böses
thun/ denn ich thu yhn eytel guts/ so hassen sie mich/ Das als
so beyde meine rechte lere vnd gute werck vnd wunder von
yhn gehasset vnd verfolget werden. Was sol ich nu mehr
thun? Was wil doch hie vbrig sein/ denn das sie werd sind
beyde mein wort vnd werck zuuerlieren? Das ist/ das sie ver
flucht werden/ denn sie wollen schlechts keinen seggen noch
guts. Tu magts nicht anders sein/ denn wer guts nicht wil/
der mus böses haben/ Wer nicht wil gesegnet sein/ der mus
verflucht sein/ wie nu weiter auch folget.

6 Setze gottlosen vber yhn/ Vnd der
Satan stehe zu seiner rechten.

Schrecklicher vnd grewlicher fluch vnd unglück hab
ich ynn aller schrift nicht gelesen/ denn diese zween vers ges
ben/ welche alleine billich solten erschrecken/ vnd alle welt zu
enge machen

enge machen allen / die Gotts wort verfolgen vnd anfechten
Denn hie spricht er / Setze gottlosen vber sie. Dis setzen heist
Ebreisch / Pitad / Das ist / bestellen vnd ordenen zum ampt /
wie man Bisschone / Pfarrer / Prediger odder auch weltliche
herrn vnd amptleute einsetzt / Also ist hie die meynunge / weil
sie mich vnd meine lere schlecht nicht leiden mügen / vnd wol
lens aller dinge so haben / so las gehen / Las vber sie falsche
lerer / Rottengeister vnd eytel gottlose prediger vnter sie ko
men / die sie eytel lügen / gottlose lere / vnd yrthum leren / vnd
von einem yrthum ynn den andern verführen / So wollen sie
es haben.

Dazu Satan stehe zu yhrer rechten / das ist / der teufel /
durch seine Apostel / reite sie also / das / ob sie gerne eraus wol
ten vnd meynens fast gut / vnd sich stellen als wolten sie zur
rechten vnd gerne recht vnd warheit wissen / So sey der teu
fel da / vnd verstelle sich als ein Engel des liechts / vnd hynde
re sie / halte sie mit solchem schein vnd schönen gedanken
vnd Worten auff / vnd verstocke vnd verblende sie / das sie
nicht mügen eraus kómen / ob man yhn gleich die warheit so
helle vnd durre fur legt / das sie es greiffen möchten / Solche
straffe sehen wir heutes tages ynn den Jüden / das sie nicht
weichen von yhrem synn / ob sie wol wissen / das sie vberroun
den sind mit der schrift. Wer machts? Nicht vernunft noch
menschliche blindheit (denn die were zu lencken) sondern /
wie hie stehet / Satan stehet zu yhrer rechten. Also haben alle
Ketzer gethan / so thun yzt vnser Rottengeister vber dem Sa
crament / so thut auchs Papstum.

Er redet aber als von einem vnd nicht von vielen / so er
doch bisher vber viele geklagt hat / Denn es gehet fürnemlich
vber den verrether Juda / welcher (wie gesagt ist) den hau
ffen furet widder Christum als der heubtman / Aber allen die
seiner art sind / widderferet des gleichen / da er Christum
nicht mocht hören / musste er die gottlosen hohe priester hö
ren / Vnd ob er wol rewe hatte hernach / stellet sich als wolt
er recht fa

er recht faren/kam er doch nicht widder/ sondern verzwey-
felte/ denn Satan stund steyff zu seiner rechten vnd behielt
yhn.

Von solcher straffe redet Paulus auch zu den Thessalo-
nichern/ das Gott kressstige yrthum sende zu denen/ die nicht
haben die warheit angenommen vnd müssen der lügen gley-
ben/ Vnd Christus Johan. 5. Ich bin komen ynn meines vas-
ters namen/ vnd yhr nemet mich nicht auff/ ein ander wird
ynn seinem namen komen/ den selbigen werdet yhr auffne-
men. Eben so gehets yzt auch bey vns ynn Deutschen lan-
den/ vnd wird noch mehr werden.

7 Wenn er gericht wird / müsse er verdampt
ausgehen/ Vnd sein gebet müsse sünde sein.

W furchte vnd demütige sich alle welt fur Gotts wort/
wie greulich laut doch das: Alle sein leben (spricht er) das
er füret auffs allerheiligeste/ vnd nicht anders meynet/ denn
er füre es nach Gotts wort auffs aller beste/ das müsse ver-
dampt vnd fur Gott ein vnchristlich teufflich leben sein/
Was hilfft sie nu so gros/ strenge/ harts leben: so viel fasten/
zucht vnd der gleichen seiner werck: Dazu spricht er/ wenn
er bettet zu Gott (Welchs sie doch fast starck treiben) sol
nicht alleine vngheort/ sondern auch sünde sein/ das sie durch
yhr gebet noch mehr verdampt werden/ Wie Christus Mat.
23. den heuchlern auch drawet/ die lange beten.

Das wort/ Wenn er gericht wird/ Ist von dem gericht
gesagt/ welchs durch die lere vnd predigt geschicht/ so man
der selbigen mit dem werck folget/ Denn ym vorigen vers
redet er vom predig. ampt/ Drumb ist dis gericht nicht an-
ders/ denn das recht odder lere/ darynn das böse geurteyle
vnd gestrafft/ vnd rechts leben gepredigt wird/ Also redet
der .123. Psalm von dem predig. ampt zu Jerusalem / Da
selbst sitzen die stüle zum gericht. Vnd Isa. 9. auch Jere. 21. sa-
gen/ das

gen/ das Christus solle mit gericht vnd gerechtikeit regieren/ Summa/ Das gericht odder recht/ ist die lere/ darnach sich die gewissen sollen richten vnd leben/ das man das böse meyde vnd guts thue. So sind nu diese gottlosen so geplagt/ das sie gericht vnd recht holen/ Das ist/ sie lassen yhn predigen vnd radten vnd böses straffen/ vnd meynen/ es sey so recht/ faren eraus/ thun also/ vnd bringens yns werck/ wissen aber nicht/ das solchs alles verdampft ist/ welchs sie gar für köstlich ding halten vnd den hymel damit meinen zuuerdienen/ Denn die gottlosen haben yhr wesen warlich auch yns regiment gefasset/ straffen böses/ loben gutes/ vnd gehet fein ym gericht vnd recht daher/ gleich wie bey den Jüden yhr Talmud/ bey vns Christen das geistlich recht/ bey den Türcken der Alkoran/ Vnd ist doch alles verdampft Teufflich ding.

§ Seiner tage müssen wenig werden / Vnd sein ampt müsse ein ander empfangen.

Diesen vers füret S. Peter Acto. 1. da er spricht/ Sein Episcopat müsse ein ander nemen/ vnd deutets dahyn/ das S. Matthias an Judas stat ist komen/ vnd ist recht/ on das vns das Kriechisch wort Episcopat/ vnd nu Deudsch Bisstum/ selzam lautet/ die wir solche Bisschoue vnd Bisthüme sehen/ der widder Judas noch S. Peter keines gesehen hat/ Denn Episcopus odder Bisschoff/ heyst eygentlich nicht anders denn ein amptman/ vnd Bistumb ein ampt/ Vnd ist hie des worts gleichen das droben gesagt ist/ Setze gottlosen vber sie/ Kurtz/ es heyst/ ampt vnd amptleute/ Denn sie sollen Christus amptleute sein vnd seinen befelh ausrichten/ Das ist/ sie sollen predigen vnd helffen predigen/ Wie das yzt die Bisschoue thun/ sibet man wol/ Darumb haben sie auch das ampt verloren/ vnd sind andere an yhre stat komen/ wie Matthias an Judas stat/ Denn sie sind Judas worden.

Wil er nu

Wil er nu sagen/ Judas vnd sein volck die Jüden/ sollen
billich das Apostel ampt haben/ vnd das Euangelion führen/
Aber sie wollen nicht/ Drumb komen Matthias an Judas
stat vnd die Heiden an der Jüden stat/ vnd predigen das
Euangelion/ das yhene predigen solten vnd yhn verheissen
war. Also/ weil die Bisschoue nicht predigen/ vnd dem
Papst folgen yhrem Judas/ so sollen ander komen/ die nicht
Bisschoue sind/ vnd yhr ampt furen vnd predigen.

Das ist/ das er sagt/ Seiner tage müssen wenig werden/
Das ist/ er sol nicht lange bestehen. Dis ist auch leiblich an
Juda vnd den Jüden war worden/ denn Juda hieng sich
bald/ so wurden die Jüden auch bald hernach von den Röm-
ern verstorret. Vnd folget nu weyter/ wie es den Jüden/ Zu
das volck solle gehen/ denn wie gesagt/ er redet sonderlich
von den Jüden/ wie wol es auch alle gottlose lerer trifft auff
seine weise.

9 Seine Kinder müssen wayssen werden/
Vnd sein weib eine widwe.

Das ist/ des volcks der Jüden Kinder vnd weiber solls
so gehen/ Wie denn geschach/ da yhre menner erschlagen
wurden durch die Römer ynn der verstorung Jerusalem.

10 Vnstete müssen seine Kinder sein vnd betteln/
vnd suchen/ weil yhre behausunge verstorret ist.

Alle plage/ die geistlich vnd leiblich sind/ erzelet er vber
die Jüden/ Denn das volck sehen wir fur augen/ wie sie sint
der zeit yhrer verstorung vnstete sind/ hie vnd da ausgetrie-
ben werden/ vnd nirgent gewis sitzen/ vnd müssen allenthal-
ben betteln/ nicht vmb brod/ sondern vmb wonung ynn lan-
den/ Denn sie müssen an allen enden wonung suchen/ sind
yhre wonung ynn Jüdischen land verstorret ist/ vnd haben
nirgent kein

J. ij

nirgent kein

nirgent kein eygen land / stad / dorff / noch regiment. Vnd solt doch dieser vers die Jüden bewegen / weil sie sehen / das yhn allein vnd sonst keinem volck vnter der sonnen so gehet / Denn kein volck ist / es hat ia eygene Dörffer / Stedte vnd Land / on die Jüden alleine / die sind allenthalben vnd haben nirgend nichts eygens / Land / Stad odder Dörffer / sind alle zumal vngewisse geste vnd betteler.

11 Es müsse der wücherer aussaugen alles was er hat / vnd frembde müssen seine erbeyt rauben.

Es solt wol widder synnisch zugehen denn dieser vers sagt / weil die Jüden berümbte wücherer / yderman auffaugen / wo sie sind. Aber der psalm wil so viel sagen / das sie kein glück sondern eytel vnglück sollen haben an leib / seel / kinder / gut vnd ehre / Denn ob sie gleich fast wuchern / so kömpt ein grösser wücherer denn sie / vnd nymmet yhn doch / wie das ander teyl sagt / das frembde yhre erbeyt rauben / Denn es gehet den Jüden also / das wenn sie lange sammeln / so kömpt ein vnfall / das man sie veriagt / beraubt / strafft vnd nympt yhn was sie haben / wie sie wol wissen vnd teglich klagen.

12 Vnd müsse niemand sein der yhn wolthat beweise / Vnd niemand erbarme sich seiner wayesen.

Herr Gott / das ist allzuwar / Man helt die Jüden für hunde / vnd wer yhn leyds thun odder sie schabernacken kan / der lest sich düncken / er habe wol gethan / Denn weil sie vnd yhre kinder nicht wollen Christum annemen / ist keine barmhertzigkeit da / vber die verstockten leute / noch leyden sie es / so feste stehet Satan zu yhrer rechten vnd hoffen vmb sonst eins bessern.

seine nachkommen

13 Seine nachkommen müssen ausge-
rottet werden / yhr name müsse ynn
einem gelied vntergehen.

Zie kompt er widder auff viele vnd spricht / yhr name /
nicht sein name / Das wir sehen / wie er von ein ganzen volck
redet / Das ist alles erfüllet / sint der verstörung Jerusalems /
Denn sint der zeit ist kein Jüdischer mensch komen / der et
was were geacht ynn der Christenheit vnd für Gott / Son-
dern mit den Aposteln / welche die letzten waren die ein na-
men behalten haben / ist yhr gedechtnis vnd namen gar aus /
so sie doch vorhyn / so viel veter vnd Propheten gehabt ha-
ben / der name bis auff heutigen tag nicht schweiget / sondern
yhr lere vnd leben ynn aller welt preiset / Der halben sie aber
sint der zeit keinen gehabt / Vnd ist also bey eines menschen
gedechtnis / alle yhr name vnd ehre aus.

Denn das sie solten alle auch leiblich ausgerottet sein /
vnd vnter sich selbs keines mehr gedechtnis sein / das were
widder die obgesagten vers / das yhr nachkommen sollen bet-
teln vnd elend leiden / Sol das sein / so müssen sie ia nachko-
men haben / Aber bey Gott vnd Gotts volck gelten sie nicht
mehr / wie doch yhre veter vnd Propheten gelten / Sie
warten wol auff einen Propheten der gelten solle / Aber da
wird nicht aus / Dieser vers sagt / es sey aus mit yhn gewesen
sint der Apostel zeit.

14 Seiner veter missethat müsse gedacht werden
für dem **HERRN** / Vnd seiner mütter sün-
de müsse nicht vertilget werden .

Seiner (das ist dieses volcks der Jüden) Vnd ist die
meinung / Es müsse geschehen / das man ynn aller welt sage /
wie S. Stephanus Act. 7. zu den Jüden sagt / Ihr habt all-
zeit dem

zeit dem heiligen geist widerstanden/ wie ewer veter also
auch yhr/ Denn so sagt man billich/ gleich wie der Jüden ve-
ter vnd mütter/ Das ist/ yhre vorfaren allzeit den Propheten
vngheorsam waren/ also sind yzt yhre kinder auch/ Denn sie
glauben eben den selbigen Propheten nicht/ welchen yhre ve-
ter auch nicht glaubten/ ist einerley vnglaube/ Zetten yhre ve-
ter gegleubet/ so hetten sie die Propheten nicht erwürget/
glaubten die Jüden yzt den selbigen Propheten/ so würden
sie Christum annemen. Aber sie bleiben ym yhrer veter sun-
de/ so vergisset sie Gott auch nicht/ vnd straffet so lange sie
sündigen.

Ich möcht gerne wissen/ was doch die Jüden zu diesem
psalm sagen kündten/ Sie müssen yhe bekennen/ das die
schriffte von yhn rede/ wie S. Paulus Ro. 3. sagt/ dazu zwint-
gen alle vers/ das sie von ein Jüdischen man rede/ der solchs
vnter den Jüden leidet vnd flucht/ er sey David odder wen
sie wollen/ So stymmet die erfahrung mit dem text/ das vber
kein volck solche flüche gehen vnter der sonnen denn vber sie/
wol funffzehen hundert iar lang. Davids feinden ist es ia
nicht so gangen/ Aber Ihesu Christi feinden den Jüden/ ges-
hets gleich wie hie stehet/ da kan man nicht fur vber. Aber
wie gesagt ist/ Vernunfft were wol überwunden/ Satan ste-
het zur rechten vnd lest sie es nicht verstehen.

15 Sie müssen sein fur dem **HERRN**
allwege / Vnd yhr gedechtnis müsse
ausgerottet werden auff erden.

Das ist/ die selbigen sünde yhrer vorfaren (dauon ges-
agt ist) sey ymer fur dem **HERRN**/ denn sie lassen auch
nicht dauon/ So kan Gott yhr gebet nicht erhören/ noch
yhre werck annemen/ darumb bleiben auch sie ymer fur dem
HERRN/ das ist/ sie erregen ymerdar auff s newe yhrer ve-
ter sünde/ durch yhr verstockt hertz/ weil sie ymer anhalten/
vnd bleiben

Vnd bleiben also ymer verdampte Jüden/ wie er sie droben
gemalet hat. Dazu yhr gedechtnis wird ausgerottet auch
auff erden. Nicht das man solte nichts von yhn wissen/ son-
dern das man sie nicht mehr furet ynn predigen vnd exem-
peln/ wie yhre veter vnd Propheten/ gleich wie der. 16. Psalm
sagt/ Ich wil yhr nicht mehr gedencfen ynn meinem munde.
Denn gedechtnis ynn der schrift heist nicht/ das man eines
gedencke (sonst were Judas/ Pilatus/ Herodes ymer ym ge-
dechnis) sondern das man yhn rhümet vnd lobet vnd ein
gut geschrey von yhm hat/ welchs alles Juda vnd den Jü-
den nicht geschicht/ sonderu man schilt sie ymer/ von der zeit
an da sie zurstöret sind durch die Römer.

Solchs ist alles von den Jüden ynn sonderheit gesagt/
welche sich an Christo selbs versündigt / vnd kinder vnd
nachkommen haben. Aber die Ketzer/ Kotten vnd Bapstum
die nicht kinder haben/ haben auch yhre plage/ das sie zu letzt
vnter gehen/ vnd yhr gedechtnis ausgerottet wird/ das sie
nymer gelten/ wie izt dem Bapstum geschicht/ dauon sonst
gnug gesagt ist.

16 Darumb / das er nicht dran gedacht /
das er wolthat beweisete / sondern ver-
folgete den elenden vnd armen / vnd den
mit betrübten hertzen / das er yhn tödtet.

Droben ym andern psalm ist auch gesagt von denen/
die eine hangende wand vnd zustossen zaun vollend nydder
treten/ welchs er hie mit klaren Worten deutet vnd spricht/
Es sey ein solch böß buben stück/ das sie sich an einen elenden
armen vnd sonst gnug bekümmerten menschen machen /
dem sie billich auff helfen vnd trösten solten/ vnd wie er hie
sagt/ wolthat beweisen/ so thun sie yhm das aller ergest/ vnd
helffen yhm nür zum todte/ wollen dennoch Gott einen di-
enst dran gethan haben/ Gleich als zu vnsern zeyten auch vn-
sere zornige

sere zornige Fürsten vnd Bisschoue vnd gelerte henchler/las-
sen den Türcken vnd yhrs gleichen wol mit friden/wie grosse
Ketzer vnd verfürer sie auch ymer sind bey yhn geachtet/ die
wand stehet zu feste/ vnd der zaun weeret sich/ Aber wo etwa
ein armer bürger/ odder elender pfarrher vnd prediger ist/
der kaum das brod hat vnd alle not leydet/ An den selbigem
machen sich die grossen zornigen Fürsten vnd Bisschoue/ der
mus leiden/ da haben sie eine hangende wand vnd gebeuge-
ten zaun funden/ da werden sie ritter hie auff erden/ vnd ver-
dienen dazu den hymel. Hie hat der Larwe eine maus gefan-
gen/ vnd lest sich düncken/ er habe den lindwurm vberwun-
den/ Solches Adels vnd Junckern ist Deudsch land yzt vol/
die ynn den bierheusern Pestilentzen vnd veytstantzen/ vnd
nür das messer stozzen können widder arme elende wehrlose
leute/ als denn sind sie vom Adel/ pfu/ welch heylose leute/
ia sew vnd wilde thiere sind doch wir Deudschen/ das so gar
kein adeliche gedanken odder mut ynn vns ist / auch nach
der welt.

Thu Gott (spricht er hie) wird yhr widderumb nicht
vergessen/ Denn er hat yhre bosheit auffgezeychnet/ vnd ob
sie für der welt für frome redliche leute werden geachtet/ So
helt er sie doch für mörder vnd bösewichter/ Denn hie sihestu
wes er sie zeyhet/ vnd was er yhn für namen vnd sache zu-
schreibt. Erstlich/ das sie nicht gedenccken ein mal wol zu-
thun dem armen vnd elenden/ Das ist/ sie sind vnbarmer-
zig/ auch gegen die elenden/ Darumb sie auch on alle barm-
herzikeit müssen verderben/ wenn sie auch ynn not vnd elen-
de komen/ auff das yhn gemessen werde/ wie sie gemessen ha-
ben. Zum andern/ das sie nicht alleine vnbarmerzig sind/
sondern verfolgen noch dazu die selbigem elenden zum todt/
Das ist doch vber die masse gesündigt/ wenn man auch die
elenden verfolget vnd würgget/ welchen doch die wilden thi-
ere vnd vnuerminfftige creaturn gerne helffen. Ja wer glaubt
aber/ das sie für solche bey Gott gehalten werden/ Vnd das
solche grewliche

solche grewliche vrteyle vber yhrem kopffe schweben vnd alle stunde dreyen: Da gehören geistliche augen zu/bis die erfahrung kome/wie den Jüden geschehen ist.

17 Und er liebete denn fluch / der wird yhm auch komen / Und wolte des segens nicht / so wird er auch ferne genug von yhm komen.

Das ist/ er wolt schlechts verflucht vnd vermaledeyet sein vnd verflucht sich selbs/ so grosse lust hatte er zu seiner verfluchung/ Nicht das sie öffentlichen fluch lieben/ sondern der heilige geist zeigt mit den worten yhre grewliche iemerliche blindheit vnd verstockunge an/ das sie das für seggen halten/welchs der ergeste fluch ist/ vnd widerumb das für fluch/welchs der edelste seggen ist/ Als da die Jüden für Pilato vber Christum rieffen/ Sein blut kome vber vns vnd vnser kinder. Ich meine ia/das sey ein fluch der sie noch hart genug drückt/ Dennoch hielten sie es für den besten seggen/ Denn sie dachten/ O das wir diesen vbelheter umbbringen/ ist wolgethan für Gott / wollens wagen / was man vns drum drawet/wissen wol/das ein seggen dafür vber vns komen wird/ darumb las frisch her gehen sein blut vber vns/ Also wolten sie auch des segens nicht/ da sie yhn verleucketen zum Könige zu haben vnd sprachen/ Wir haben keinen König/on den Keiser/ als solten sie sagen/ Der Teuffel habe diesen König/es were eytel fluchen vnd vnglück zc.

Also thut yzt das Papstum mit den seinen auch / Sie sind dem Euangelio feind worden vnd habens verdampft/ was man yhn dreyet/ das halten sie für seggen/ Ja sagen sie/ der Teuffel begere deins Euangelions/vnd Gott behüte mich für deinem gebet/ Ich wil aber wagen vnd warten deines
K drawens

bravens zc. Wenn nu solche leute schön kein ander vnglück
hätten/ meynstu nicht/ es sey vnglücks gnug/ ein solch ver-
stockt/ verblind/ verhertet hertz haben/ das widder siben
noch höret/ vnd yhm schlechts nicht sagen lest/ feret dahyn/
vnd meinet/ es gehe ym segen vnd nicht ym fluch/ vnd sch-
eucht den segen/ als einen fluch: O Herr Gott las vns an-
dere sünde thun/ denn solche/ so wir ia sundigen sollen.

18 Vnd zoch an den fluch/ wie sein heimbde/
vnd ist ym sein ynnwendigs gangen wie
wasser/ Vnd wie öle ym sein gebeyne.

Zie zeigt er an wie tieff solche verstockung ym yhrem
hertzen sticket/ vnd wie fest sie sitzt/ das sie schlechts nicht sind
zubekeren/ Da ist verloren alle predigt/ vermanen/ dreyen/
singen vnd sagen/ Vnd er malet solchs mit dreyerley gleich-
nis ab. zum ersten/ mit dem heimbde odder kleyd/ Gleich wie
ein mensch on heimbde / odder on das nehest kleyd am leibe
nicht sein kan/ denn man nicht nackt gehen sol/ das also sein
kleyd teglich an sein halse sein mus/ Also hanget den Jüden
auch an die verstockung das sie den fluch lieben/ Da ist kein
rad/ sie können on solche verstockung nicht sein/ Ist auch yhr
tegliche vbung/ gleich wie ein teglich kleyd am leybe hanget.
Ober das meinen sie dennoch/ es stehe yhn wol an/ vnd sey
recht vnd thun wol dran/ gleich wie einem sein kleyd wol an-
stehet vnd thut recht/ das ers trage/ vnd thete vnrecht/ wo
er on kleyd nacktet gienge/ Also die Jüden meinen auch/ sie
theten schendlich ding/ wenn sie die verstockung ablegten.

Zum andern/ Wenn ein mensch wasser odder sonst et-
was trinckt (denn durch wasser die Ebreische sprache aller-
ley tranck/ vnd durch brod ellerley essen verstehet) vnd ist nu
so fern hynein komen/ das verdawet vnd zum fleisch vnd
blut worden ist / Wer wil das widder eraus bringen: Da
hilfft kein

hilfft kein bad / schweis noch ertzney / es ist zur natur worden /
vnd wie er hie sagt / ynn sein ynwendiges komet / es mus drin
nen bleiben vnd mit yhm / vnd er mit yhm zur helle yns ewige
feyr faren / Also gehets auch den Jüden / yhre verstockung
ist so ferne ynn sie komet / das gleich yhr natur worden ist /
vnd können nu nymer mehr anders thun / Doch meinen sie /
es sey gut ding / ia es sey eytel labfal / vnd edler tranck der sie
erquicket / durst lessche vnd sie wol neere / Denn sie trincken vnd
trencken sich teglich damit / vnd erhalten sich damit / gleich
wie ein mensch teglich mit trincken sich labet / kület / quickt
vnd erhelt / Denn sie leren vnd hören solche flüche / mit lust
vnd grosser begirde / gleich wie ein dürstiger mit grosser bes
girde trincket / Das heyst / meyn ich / den fluch lieben.

zum dritten / redet er hie von öle / Das ist / von gutem öle
odder balsam / da man sich mit salbet / wie denn des bawm
öles art ist / das es dem leibe seer nützlich ist / macht gerade /
starcke / gesunde / schöne vnd geschickte glieder / Der halben
die Kempffer yhre leibe mit öle pflegen zu salben. Wenn nu
sich ein mensch mit öle odder salben schmird / vnd so ferne
bringt / das durch beyn vnd marck gehet / wie denn die guten
salben thun nach yhrer art / Wer wil das eraus widder brin
gen? kan mans doch schwerlich aus kleydern bringen / Da
hilfft auch kein waschen noch wisschen / fegen noch keren /
man müste beyn vnd marck sampt der salben zu schmelzen /
vnd keme dennoch nicht eraus. Also ist der fluch vnd versto
ckung der Jüden so gar durch hertz / mut vnd synn gangen /
durch marck vnd beyn getrieben / das da keine hülfße nach
rad ist / Sondern ynn der hellen zurschmelzt müssen werden
vnd doch nicht dauon gefegt odder reyn werden / Dennoch
meinen sic ynn des / Es sey eine köstliche salbe / vnd solche lere
sey yhn so gesund / als das öle dein leybe / vnd achten / sie wer
den damit starck / fein / schön / angenehme vnd gleissen für
Gott / wie das öle den leyb macht für den leuten / Schmierem
sich ymer damit / yhe lenger / yhe mehr.

K ij Das sehen

Das sehen wir auch an den Jüden teglicher erfahrung
wol/wie steiff vnd verstockt sie sind/von kind zu kinds kin-
dern/So giftig vnd heuchlich können sie von Christo reden/
das vber allemasse ist/Denn sie haltens für cytel fluch vnd
gysst/was wir von Christo glauben vnd leren/Meinen sch-
lecht nicht anders/denn Christus sey ein böser bube gewesen/
der vmb seiner bosheit willen sey gecreuzigt mit andern bu-
ben/Drümb wenn sie yhn nennen/so nennen sie yhn schmech-
lich Thola/Das ist/den erhengeten/Denn weil sie das glau-
ben/das Ihesus ein bube sey gewesen/so kans nicht anders
sein/sie müssen vns Christen für die aller törichsten vnflätig-
sten leute halten/so vnter der sonnen sind/Weil die vernunft
hie mus sagen/das/wenn heute ein mörder geköpfft würde/
vnd morgens kemen etliche leute/vnd betten yhn an vnd hi-
elten yhn für einen rechten Gott/das were doch viel nerris-
scher/denn so yemand einen Klotz odder stein anbetet/vnd
kündte nicht nerrischer sein.zu dem schlegt nu/das wir Chri-
sten auch böse sind vnd böse exempel geben/Also werden sie
allenthalben verstockt vnd geergert/das solcher fluch mus
wol durch beyn vnd marck gehen vnd sie so tieff vergifften/
das sie nicht mügen eraus kómen/vnd den gecreuzigten
Ihesu für einen Herrn vnd Gott haben/Vnd bleibt also bey
yhn ein lecherlich ding/das wir Christen einen bübischen
vnd verdampften Jüden anbeten/als wenn wir Rain odder
Absalom für Götter anbetten/Da sticken sie/das öle ist ym
yhre gebeyne gangen/das wasser verdewen sie on auffhö-
ren/O ein schrecklich vrtail vnd exempel Göttlichs zorns.

19 So werde er yhm/wie ein Kleyd das
er an habe / vnd wie ein gürtel / da er
sich alle wege mit gürtet.

Das ist/Es geschehe yhm wie er wil/vnd der fluch/den
er ia haben wil/müsse yhm anhangen/Müsse das Euangeli-
on für

on für gift vnd fluch / vnd Christum für einen buben halten /
Er sey vnd bleibe also verstockt / das Gott die hand abethu /
vnd gebe seinen geist vnd wort nicht vnter sie / das sie bekeret
werden / wie er auch Isa. 5. dreyet / Ich wil meinen wolcken
gebieten / das sie nicht vber sie regenen sollen / Nicht das gar
kein Jüde nymer mehr zum glauben komen müge / Denn es
müssen noch etliche brocken vber bleiben / vnd etliche einzelen
bekeret werden / Sondern das Judenthum / welchs wir das
Jüdische volck heissen / wird nicht bekeret. Es wird auch das
Euangelion nicht vnter sie gepredigt / auff das dadurch der
heilige geist raum bey yhn funde / sondern / wo sie beysamen
sind / vnd yhre schulen sind / da bleiben sie bey yhrem fluch
vnd gift / das sie Christum verfluchen / vnd yhren gift für
heyl / vnd fluch für segen halten müssen. Aber nichts deste we
niger springen zu zeyten etliche von dem hauffen entzelen
ab / auff das Gott dennoch des Samens Abrahe Gott blei
be / vnd sie nicht gar verstoffe / wie Sanct Paulus spricht
Rom. 11.

Vnd hie siehestu / das er von dem teglichen kleyde vnd
gürtel redet / nicht vom kleyde das ym kassen ligt / odder vom
gürtel der ynn der laden ligt / sondern den er teglich treget
vnd anhat / zu bedeuten den verstockten synn / dauon sie ny
mer mehr lassen / vnd den verherzten fluch / da mit sie teglich
vmbgehen vnd nicht ablassen / vnd meynen / es stehe yhn wol
an.

So geschehe denen vom **HERRN**
20. die mir widder sind / Vnd reden bö
ses widder meine seele.

Das gebet ynn diesem psalmen ist erhöret / vnd wird
so gehen allen feinden Christi / furnemlich aber den Jüden /
welche er sonderlich meynet / vnd das werck ynn der offent
lichen erfahrung beweiset / Denn es ist alles zuthun vmb das

R ij

wort odder

wort odder reden/ das sie widder Christum leren/ fluchen/ verdammen vnd lestern yhn/ wolten yhn gerne vnter haben. Das heyst/ sie reden böses widder meine seele/ Das ist/ widder mein leben/ wolten gerne / das ich störbe vnd verdörbe / so hart sind sie mir widder. Aber der Gott seines lobes/ schweiget nicht/ preiset vnd erhöhet yhn/ yhe mehr sie yhn verfluchen vnd verdammen.

Vnd hie mügen wir vns auch alle wol furchten/ sonderlich alle Ketzer vnd falsche lerer/ Denn es gilt yhn auch was hie Christus bittet. Wo der vnfal kömpt/ das man ynn einem stück Christus meinung feylet vnd eine eygen meinung leret/ Da gehets alles dahyn/ vnd ist der ganze Christus verloren/ wie er selbst sagt/ Matth. 5. Wer der geringsten gepot eines aufflöset vnd leret die leute also/ der sol auch der geringste ym hymel sein/ denn nicht ein iota odder tütel sol vergehen/ zc. Darnach fellet man drauff/ vnd gehet solcher synn wie wasser ynn das ynnwendigste/ vnd wie öle durch gebeyn vnd marck/ vnd wird das tegliche kleyd draus. Da hebt sichs denn/ das ein teyl das ander verflucht/ vnd eins iglichen teyls lere ist dem andern teyl/ eytel gyfft vnd fluch/ vnd sein eygen lere eytel segen vnd heyl/ wie wir das sehen yzt auch an vnsern Rotten Papisten/ Zie ist denn verloren/ der hauffe bekeret sich nicht / Lynzele vnd wenige/ welche Gott erwelet/ die komen widder zu recht/ Die andern bleiben ynn yhrem fluch vnd gyfft/ wie die Jüden/ vnd haltsens für köstlich ding. Das ist denn/ das er hie sagt/ wie alle feinde Christi lieben fluch vnd hassen den segen/ da bey sie auch bleiben. Darumb spricht auch Sanct Paulus Tit. 3. Das man den Rottischen menschen solle meiden/ nach zwo vermanunge / denn er ist verkeret. Ich habe auch nie gelesen/ das die lerer/ so Ketzerrey anheben/ bekeret sind/ Sie bleiben ynn yhrem dänckel verstockt/ das öle ist durch marck vnd beyn gangen/ vnd yhr wasser ist fleisch vnd blut/ ganz yhr natur

yhr natur worden/ sie lassen yhn nicht sagen noch weren/
Das ist die sünde ynn den heiligen geist/ die keine vergebung
hat/ Denn sie hat auch keine busse noch rewe/ sondern ver-
teydingung vnd entschuldigung/ als sey sie heilig/ köstlich
ding/ vnd das recht Euangelion/ so widder sie leret/ cytel
Teuffels ding.

21 Aber du **HERR** **HERR** thu an mir
ymb deines namens willen/ Denn deis-
ne Güte ist lieblich / errette mich.

Hie keret er sich widder zu Gott/ vnd bit auch für seine
sache/ das sie gefodert werde/ vnd oblige/ denn es mus bey-
des sein/ das die gottlosen endlich vnterligen vnd die gerecht-
ten gewynnen/ Er spricht aber/ seine sache sey nicht sein/ son-
dern Gottes selber/ Denn das macht ein thürstig vnd frey-
dig hertz für Gott/ zu bitten für sich widder die gottlosen/
wenn man gewis ist/ das wir ymb Gotts wort vnd werck
willen/ handeln vnd leiden/ nicht vns selbs suchen. Drumb
spricht er/ Thu an mir ymb deines namens willen/ Das ist
du sihest ia/ das die sache dich angehet/ Deinen namen/ dein
wort / deine ehre preise ich/ so lestern sie das alles/ Lessestu
mich/ so verlessestu auch deinen namen/ aber das ist vn-
müßlich. Was sol er aber an yhm thun? Die liebliche güte/ die
freundliche wolthat/ das er yhn errette/ wie folget/ Vnd er-
rette mich denn die errettung ist lieblich vnd süsse denen/ so
ynn not vnd angst sticken/ wie er spricht.

22 Denn ich byn elend vnd arm/ Mein
hertz engstet sich ynn mir.

Das verstehet man wol aus dem leiden Christi/ da er
nicht alleine eufferlich elend vnd arm war am leibe/ von yder
man verlassen vnd verfolget/ sondern auch ynnwendig be-
trübt vnd

erübt vnd geengstet/ vnd alle lesterung vnd schmechwort hö-
ren muste/ welche fast wehe thun/ auch allen fromen Christo-
lichen hertzen/ den die warheit lieb ist.

23 Ich gehe dahyn wie eine schatte
dahyn fleucht / vnd werde aus-
gesteubet wie hewschrecken.

Faren wie eine schatten/ ist so viel als vnstete sein/ hyn
vnd her faren/ wie der wind die wolcken treibt/ das die schat-
te keinen gewissen/ sichern/ eygen ort hat. Wie Hiob. 7. stes
het/ von aller menschen leben geschrieben/ Der mensch lebt
eine kleine zeit/ vnd fleucht wie eine schatte/ vnd bleibt nicht.
Fliehen heyst hie nicht wie die vogel fliehen/ sondern wie Da-
uid fur seinem son Absalom floch vnd Jacob fur seinem sch-
weher Laban/ Auff Ebreisch Barah/ Das so viel sey gesagt.
Der mensche mus weichen vnd dauon / er wird getrieben
vnd kan nicht bleiben. Also spricht hie Christus auch/ das
sein leben ynn der welt also sey gethan/ das sie yhn nicht ley-
den kan/ iagt vnd treibt yhn von einem ort zum andern/ bis
sie yhn gar veriage/ wie der wind die wolcken treibt. Also ges-
het es dem Euangelio auch/ Tyrgernd ist es leidelich/ die welt
webd vnd bleset so lange bis sie es veriagt/ mit seinen lerern.

Ausgesteubert werden wie hewschrecken/ ist eben das
selbige. Es ist bey vns aber finster vnd dunckel gered/ die wir
des thieres Arbe nicht kennen noch seine art. Wir heissens
hewschrecken/ Es sind aber nicht hewschrecken/ sondern den
hewschrecken odder heymen gleich. Es ist ein gemein thier
ynn Morgenlndern/ vnd die Parther vnd Moren essens/
dazu auch vnser hewschrecken vnd heymen/ wie die Walen
frösch vnd schnecken essen. Sanct Johannes der Teuffer hat
auch die selbigen Arbe gessen/ wie die Euangelisten schrei-
ben. Es

ben. Es sind aber solche thierlin die keine augen haben / schar
ren aber scer mit den flügeln / Drumb halten sie sich zu sament
vnd fliegen mit grossen hauffen on König / wie Salomo
sagt ynn seinen sprüchen. 30. vnd wo sie nydder fallen / da
fressen sie auff alles was grunet. Das ynn den selbigen len
dern ein landrecht ist / des iars drey mal sie zuuertilgen mit
mans krafft. Ein mal wenn sie eyer legen. Zum andern wenn
sie ausgeheckt haben. Zum dritten / wenn sie erwachsen sind.
Vnd ist eine sonderliche landplage von Gott / wenn sie ko
men wie eine tewrezeit / Pestilenz odder Krieg / wie Egypten
land auch damit geplagt ward Exodi. viij.

Zweyerley weise werden sie gedempfft / Ein mal mit wa
ffen vnd mans krafft / wie yzt gesagt ist. Zum andern / Das
ein wind kompt (von Gottes ordnung) der sie nympt vnd
wirfft sie ynn neheste meer odder see / wie ynn Egypten ge
schach. Also schreibt Isaia vom Könige zu Assyrien / das sie
sollen gescheucht vnd veriagt werden / wie die Arbe wenn
man vnter sie rumpelt / Desselbigen gleichen Nahum cap. 3.
spricht auch / das die Fürsten zu Ninive sollen zuuagt vnd zu
scheucht werden / wie die Arbe / Das man wol sihet / wie die
Propheten dieser gleichnis gebraucht haben / wenn sie wol
len reden / von ein veriagten vnd vertrieben Könige odder
person / gleich als wir ynn vnsern landen möchten sagen von
den dolen odder Freyen / wenn man sie aus yhren nesten mit
yhren iungen verstöret vnd veriagt zc. Also wil nu hie Chris
tus sagen / Er sey vertrieben / zu strewet vnd zu scheucht / zu
steubet wie die Arbe / Welchs auch geschach / da er gefangen
vnd seine Jünger yhn verliessen vnd zustrewet worden / Wie
es denn noch teglich gehet vnd allzeit gangen ist / das wenn
sich eine verfolgunge widder die Christen vnd Gottes wort
erhebt / ein gescheuch / geiegde / vnd zurtrennen hebt / Das
wol dieser vers mag Christus vnd seiner Christen titel heys
sen. Vnd dis Ebreische wörtlin Naar / heyst aussteuben / od
L Der aus

Der ausschüttelt/wie man einen mantel ausschüttelt obder
aussteubet/ Vnd wir reden auff Deudsch also/ wir haben sie
ausgesteubert/Daher man die iaghunde Steuber nennet/die
die hasen vnd wild auff scheuchen vnd steubern/das die has
sen auffaren vnd dahyn wiffchen/hie vnd daher wie Staub/
Das heyst zustoben vnd zuflogen wie der wind den Staub zu
strewet/Vnd die hunde die winde heysen/ auch dem wild
vnd hasen thun. Wenn nu hie Christus so spreche/Ich wer
de ausgesteubert/wie das wild von steubern vnd winden
wird ausgesteubert/ so were es fast leicht/vnd liecht gewest
vns Deudschen.

23 Meine Knye sind schwach von fasten/Vnd
mein fleisch ist mager das kein fet hat.

Das ist/Sie sind vol vnd sat/Ich aber mus hunger
vnd not leiden/wie auch S. Paulus sagt zu den Corinthern/
wir leiden hunger vnd durst/Das Christus vnd seinen Jun
gern oft an speise gemangelt habe/ ist kein zweyfel/denn er
war ia arm/vnd die reichen gaben yhm nichts. So wil er nu
sagen/Was machen sie doch/das sie mich verfolgen/der ich
so arm bin/hab ich doch widder gelt noch gut? Ja solt ich
von yhn erneeret werden ich müste wol hungers sterben. Nu
thun sie nicht alleine das/das sie mich nicht neeren/ sondern
verfolgen mich auch dazu/Denn so sols auch gehen ynn der
welt/das die rechten prediger/nicht das brod zu essen haben/
allen mangel/iamer vnd not leiden/Die versurer aber sollen
gnug haben/ia gros Fürstenthum besitzen/auff das dieser
vers war bleibe/Christus müsse hunger vnd not leyden/
Denn dieser vers wil nichts/denn das man Christum vnd die
seinen nicht neeret ynn der welt/sondern auch verfolget/wie
er denn sagen wird am iüngsten tage/Ich war hungerig
vnd yhr speyset mich nicht.

Vnd ich

24 Vnd ich war yhr spot/ Wenn sie mich
ansahen schüttelten sie yhren kopff.

Der vorige vers sagt/ wie die welt Christum nicht nee-
ret/ Dieser sagt wie sie yhn auch nicht ehret/ sondern spottet
vnd veracht. Summa/ gut/ ehre vnd leben kan die welt Chri-
sto nicht gönnen/ sondern armut/ not vnd elende mus er tra-
gen/ schande/ hon vnd spot mus er haben/ schmerz vnd tod
mus er leyden/ sampt allen den seinen. Also wil er nu hie sa-
gen/ Was ich redet odder thet/ das must verspottet sein/ Da-
römpfften sie die nasen/ schüttelten den kopff vnd worffen
das maul auff/ sie hieltens für narheit vnd nichts. Was solt
ich doch mehr thun? Alles guts thet ich yhn/ So thun sie
mir alles leyd/ wie er droben sagt. Sie thun mir böses vmb
guts/ alles böses vnd vnels leid ich von yhn/ noch wollen sie
mein nicht. Wolan so mügen sie faren. Sie haben keine ends
schuldigunge/ Ich habe mehr denn gnug bey yhn gethan.

25 Stehe mir bey **HERR** mein Gott /
Hilff mir nach deiner güte.

Da beschleust er den psalm/ das Gott wolte mit yhn
sein/ vnd der Jüden vnd aller seiner feinde bosheit/ dazu seine
gerechtigkeit offenbar machen/ damit sie zu schanden wer-
den/ vnd er bey ehren bleybe/ vnd das alles vmb seiner güte
willen. Denn bisher hat er angezeygt / was für fluchs vnd
vnels yhm widderfare/ durch yhr verstocktes vnd verblend-
tes hertz/ Nu bittet er/ das solchs durch Göttlich vrteil auch
für aller welt offenbar werde/ auff das auch der schein vnd
das gleissen / das sie noch haben/ abgenomen werde/ vnd für
aller welt zu schanden werde / vnd also beyde ynn sunden
vnd schanden müssen sticken bleiben/ wie wir denn sehen/
das den elenden Jüden yzt gehet.

L ij

Das man

26 Das man erfare das dis deine hand ist/
Das du **HERR** solchs thust.

Ob sie es nicht mercken wollen/ das solchs alles/ was du an mir vnd an yhn thust/ dein werck sey/ das doch fur aller welt offenbar werde/ vnd yderman müsse sagen/ Wolan/ Das ist Gotts werck/ das die Jüden also gar vntergeheit vnd vnterligen/ Christus aber also oben schwebd/ vnd zunympt/ Menschen krefft hettens nicht vermocht.

27 Ifluchen sie so segene du/ lehnen sie sich auff/ so müssen sie zu schanden werden/ Aber dein knecht müsse sich frewen.

Las nichts gelten noch helffen/ das sie mir vnd den meinen fluchen/ Sondern yhe mehr sie fluchen yhe mehr du segene. Vnd lehnen sie sich etwa widder mich auff/ das las nur bald zu schanden werden. Ich meine/ dieser vers solte den Juden schier bekand sein. Hilff Gott/ wie offte vnd ynn viel landen haben sie ein spiel widder Christum angericht/ darüber sie verbrand/ erwürgt vnd veriagt sind/ Es fehlet nicht/ wenn sie sich auff lehnen/ so komen sie ynn alle schande/ werden iemerlich verbrand/ odder veriagt. Aber Christus vnd die seinen bleiben frölich ynn Gott/ als die dadurch bestettigt werden ynn yhrem glauben.

28 Meine widdersacher müssen mit schmach angezogen werden/ Vnd mit yhrer schande bekleydet werden wie mit ein rock.

Da kömpt widder die gleichnis droben vom kleyd gesagt/ das ein teglich anhangen sey des fluchs/ Aber hie redet er von der öffentlichen schande fur der welt/ die sie von solchem fluch

chem fluch haben/Als solt er sagen/ gleich wie sie den fluch
ym geist anziehen als ein teglich Kleyd/ also las sie auch ein
öffentlich schand Kleid eusserlich tragen/ damit sie fur aller
welt/ fur meine feinde erkand vnd veracht werden/ Das sun-
de vnd schande zwey tegliche Kleyder seyen/ sunde fur Gott
vnd schande fur der welt. Vnd sonderlich nennet er hie den
Rock Mail/ welchs auff Ebreisch heyst den langen rock der
auff die fusse gehet/ Als solt er sagen/ das sie eytel schande
müssen haben/ von der scheyteln bis auff die versen.

29 Ich wil dem **H E R R N** vleissig
dancken mit meinem munde/ Vnd
yhn rhümen vnter vielen.

Das ist/ an solchem vrteyl vnd werck/ wirstu das erlan-
gen/ das man dich von hertzen lieben vnd loben wird/ als
der du ein solcher Gott bist/ der sich der elenden so veterlich
annympt/ vnd lesset sie nicht vnterligen/ noch die gottlos-
sen/ yhren trotz hynaus furen/ Solchs sprechen wir auff
Deudsch also. Ach Herr Gott/ wer solt dich doch nicht rhü-
men vnd preisen/ fur aller welt vnd an allen enden/ das du
so gnediglich den armen hilffest/ vnd die stolzen/ verechter
vnd Tyrannen so gar mechtiglich störtzest/ straffest/ wie folg-
get.

30 Denn er stehet dem armen zur rechten/
das er seiner seele helffe von denen die
seine seele richten.

Das ist Gotts ewigs vnd teglichs lob/ das er sich der
armen vnd nydrigen annympt/ vnd nicht die grossen Han-
sen vnd stolzen Tyrannen seyret/ wie sie doch meinen/ Son-
dern er hilfft/ Ach ia/ er hilfft freylich/ nicht alleine aus zu-
selligen nöten/ sondern auch von denen/ die sein leben rich-
ten/ verdams

ten / verdammen vnd vrteylen zum tod / als einen Ketzer vnd
verfurer . Denn dis wörtlin / Richten / deutet hie die iheni-
gen / so ym ampt sitzen vnd richten / als weltliche oberkeit /
Denn da halt mans nür frey fur / das weltliche oberkeit ny-
mer mehr wird gar vnd ganz Christen werden / sondern als
lezeit das mehrer / gröste / höchste teyl / wird Christum / sein
wort vnd die seinen verfolgen / wie auch der ander psalm
sagt / Warumb toben die heiden vnd die Könige auff erden
lehnen sich auff / vnd die Fürsten radschlagen miteinander
der widder den **HERREN** vnd seinen gesalbten . Sie
hörestu / das der Könige vnd Fürsten tugent sey /
widder Gott vnd Christum fechten / das thun
sie auch . Aber es gehet yhn auch widder
umb darnach / das sie portzeln vnd ges-
stortzt werden von yhren stülen
einer nach dem andern da
hyn / wie der selbige psalm
vnd andere mehr
auch melden .

zce . .



gedruckt zu Wittenberg.
Michel Lotther.



Thomas ...

1520

46493

AB 46493


ULB Halle 3
 004 068 718



Sb.







B.I.G.

Farbkarte #13



Vier tröstliche Psalmen. An die Königin zu Hungern ausgelegt durch Martinum Luther.

Wittenberg.

M. D. XXVII.